

四庫全書

子部

欽定四庫全書

子部

宋高僧傳卷二

詳校官監察御史臣王爾烈

檢討臣何思鈞覆勘

總校官編修臣王燕緒

校對官編修臣馬啟泰

謄錄監生臣范來泰

欽定四庫全書

子部十三

宋高僧傳

釋家類

提要

臣等謹案宋高僧傳三十卷宋釋贊寧撰贊寧德清高氏子出家杭州龍興寺吳越武肅王署為兩浙僧統賜號明義宋太宗召對滋福殿賜號通慧咸平初加右街僧錄至道二年卒是書乃贊寧於太平興國七年奉太宗

勅旨編撰至端拱元年十月書成遣天壽寺僧顯忠等於乾明節奉表上進有勅獎諭賜絹三千匹仍令僧錄司編入大藏而宋史藝文志文獻通考均不著於錄殆以其已經入藏而畧之也高僧傳之名起於梁釋惠敏分譯經義解兩門釋慧皎復加推擴始分立十科至唐釋道宣續高僧傳蒐輯彌博於是分譯經義解習禪明律護法感通遺身讀誦興

福雜科十門所載迄唐貞觀而止贊寧此書  
蓋又以續道宣之後故所錄始於唐高宗時  
門目亦一仍其舊凡正傳五百三十三人附  
見一百三十人傳後附以論斷於傳授源流  
最為賅備中間如武后時人皆系之周朝殊  
乖史法又所載既託始於唐而雜科篇中乃  
有劉宋元魏二人亦為未明限斷然其於誅  
銘志記撫採不遺寔稱詳博文筆近六朝風

格亦多雅贍可觀洵釋門典故之總匯於揆藻摛文之用固不為無助矣乾隆四十四年

三月恭校上

總纂官臣紀昀臣陸錫熊臣孫士毅

總校官臣陸費墀

進高僧傳表

臣僧贊寧等言自太平興國七年伏奉勅旨俾修高僧傳與新譯經同入藏者臣等遐求事跡博採碑文今已撰集成三十卷謹詣闕庭進上益琅函而更廣延玉厯以彌長臣等誠憂誠恐兢惕之至臣等聞渾儀之外別有釋天法海之中多生僧寶釋天可則阿難記事而載言僧寶堪稱慧皎為篇而作傳猗歟我佛號大徧知知教法之無依委帝王之有力當二千載之後屬一萬年

之初伏惟應運統天睿文英武大聖至明廣孝皇帝陛下神龍在天愛日升上土疆開闢四夷請吏而貢琛時律均和百穀登敷而棲畝耕藉田而又勸賜酺飲以咸歡儒術特興玄風爰振是以麒麟非中國之物白雉非草莽之禽今遊苑囿之間且類牢籠之畜近以從瀛至濮黃河牽一帶之清自古及今青史載千年之應斯蓋陛下下來從不動之地示為長壽之王翻譯成經製甚深之御序迴文作頌演無盡之法音仍降鳳書令編僧史



屬此雍熙之運伸其貞觀之風合選兼才豈當末學得  
不擒犀截角塞翠刪毛精求出類之人取法表年之史  
所恨空門寡學釋曹何知或有可觀實錄聊摹於陳壽  
如苞深失戾經宜罪於馬遷副陛下遺賢必取之心助  
陛下墜典咸修之美今遇乾明聖節謹令弟子賜紫顯  
忠同元受勅相國寺賜紫智輪進納伏乞睿慈略賜御  
覽恭惟聖主是文章之主微臣非惇史之臣儻示天機  
令知凡例如得操北斗而斟酌或示乃圭執南箕而簸

揚方除糠糲臣等冒黷天顏無任惶懼激切屏營之至  
謹言

批答

勅通慧大師贊寧省所令左街天壽寺賜紫僧顯忠進  
編修有宋高僧傳三十卷事具悉一乘妙道六度玄門  
代有奇人迭恢聖教若無纂述何以顯揚繫爾真流棲  
心法苑成茲編集頗効辛勤備觀該總之能深切嘉歎  
之意其所進高僧傳已令僧錄司編入大藏今賜絹三

千匹至可領也故茲獎諭想宜知悉冬寒想比清休否  
遣書指不多及十八日勅



宋高僧傳序

臣聞賢劫綿長世間宏廓天與時而不盡地受富以無  
疆最靈之氣牧于中大聖之師居于上偉哉釋迦方隱  
彌勒未來其間出命世之人此際多分身之聖肆為僧  
相喜示沙門言與行而可觀槩兼觚而爭錄是以王巾  
僧史孫綽道賢摹列傳以周流象世家而布濩蓋欲希  
顏之哲慕蘭之儔成飛錫之應真作曳山之上士時則  
裴子野著衆僧傳釋法濟撰高逸沙門傳陸杲述沙門

傳釋寶唱立名僧傳斯皆河圖作洪範之椎輪土鼓為  
咸池之坏器焉知來者靡曠其人慧皎刊修用實行潛  
光之目道宣緝綴續高而不名之風今六百載行道之  
人弗墜于地者矣爰自貞觀命章之後西明絕筆已還  
此作蔑聞斯文將缺時有再至肅毅過而繁華來世無  
久虛地天奏而聖明出我應運統天睿文英武大聖至  
明廣孝皇帝陛下陽龍挺德斗電均威踐大道也犧黃  
輸執御之勞多天才也周孔行弟子之職講信修睦崇

德報功一統無遺百王有愧四海若窺於掌內萬機皆  
發於宸衷然而玄牝留神釋天淡慮長生授術時開太  
一之壇續法延期僧度倍千之戒浮圖揭漢梵夾翻華  
將佛國之同風與玉京而合制慨茲釋侶代有其人思  
景行之莫聞實紀錄之彌曠臣等謬膺良選俱乏史才  
空門不出於董孤弱手難探於禹穴而乃循十科之舊  
例輯萬行之新名或案誅銘或徵志記或問輜軒之使  
者或詢耆舊之先民研磨將經論畧同讐校與史書懸

合勒成三帙上副九重列僧寶之壞奇知佛家之富貴  
昔者嘉祥筆削盡美善於東南澄照纂修足英髦於關  
輔蓋是拘於虛也傳不習乎豈若皇朝也八極張羅舉  
之則無物不至四夷弭伏求之則何事不供臣等分面  
徵搜各塗構集如見一家之好且無諸國之殊所以成  
十科者易同拾取其正傳五百三十三人附見一百三  
十人矧復逐科盡處象史論以攄辭因事言時為傳家  
之系斷厥號有宋高僧傳焉庶幾乎銅馬為式選千里



之駿駒竹編見書實六和之年表觀之者務進悟之者  
思齊皆登三藐之山悉入薩云之海永資聖歷俱助皇  
明齊愛日之炳光應嵩山之呼壽云爾時端拱元年乾  
明節臣僧贊寧等謹上



欽定四庫全書

宋高僧傳卷一

宋 釋贊寧 撰

譯經篇第一之一

正傳三人  
附見一人

唐京兆大薦福寺義淨傳

釋義淨字文明姓張氏范陽人也髫髻之時辭親落髮  
徧詢名匠廣探羣籍內外閑習今古博通年十有五便  
萌其志欲遊西域仰法顯之雅操慕玄奘之高風加以

勤無棄時手不釋卷弱冠登具愈堅貞志咸亨二年  
三十有七方遂發足初至番禺得同志數十人及將登  
舶餘皆退罷淨奮勵孤行備歷艱險所至之境皆洞言  
音凡遇酋長俱加禮重驚峯雞足咸遂周遊鹿苑祇林  
並皆瞻矚諸有聖迹畢得追尋經二十五年歷三十餘  
國以天后證聖元年己未仲夏還至河洛得梵本經律  
論近四百部合五十萬頌金剛座真容一鋪舍利三百  
粒天后親迎于上東門外諸寺緇伍具旛蓋歌樂前導

勅於佛授記寺安置焉初與于闐三藏實叉難陀翻華  
嚴經久視之後乃自專譯起庚子歲至長安癸卯於福  
先寺及雍京西明寺譯金光明最勝王能斷金剛般若  
彌勒成佛一字咒王莊嚴王陀羅尼長爪梵志等經根  
本一切有部毗柰耶尼陀那目得迦百一羯磨攝等掌  
中取因假設六門教授等論及龍樹勸誡頌凡二十部  
北印度沙門阿你真那證梵文義沙門波崙復禮慧表  
智積等筆受證文沙門法寶法藏德感勝莊神英仁亮

大儀慈訓等證義成均太學助教許觀監護繕寫進呈  
天后製聖教序令標經首暨和帝神龍元年乙巳於東  
洛內道場譯孔雀王經又於大福先寺出勝光天子香  
王菩薩咒一切莊嚴王經四部沙門盤度讀梵文沙門  
玄傘筆受沙門大儀證文沙門勝莊利貞證義兵部侍  
郎崔湜給事中盧粲潤文正字祕書監駙馬都尉楊慎  
交監護帝深崇釋典特抽睿思製大唐龍興三藏聖教  
序又御洛陽西門宣示羣官新翻之經二年淨隨駕歸

雍京置翻經院於大薦福寺居之三年詔入內與同翻  
經沙門九旬坐夏帝以昔居房部幽厄無歸祈念樂師  
遂蒙降祉荷茲往澤重闡鴻猷因命法徒更重傳譯於  
大佛光殿二卷成文曰藥師瑠璃光佛本願功德經帝  
御法筵手自筆受睿宗景雲元年庚戌於大薦福寺出  
浴像功德經毗柰耶雜事二衆戒經唯識寶生所緣釋  
等二十部吐火羅沙門達磨末磨中印度沙門拔弩證  
梵義罽賓沙門達磨難陀證梵文居士東印度皆領伊

舍羅證梵本沙門慧積居士中印度李釋迦度頗多語  
梵本沙門文綱慧沼利貞勝莊愛同思恒證義玄傘智  
積筆受居士東印度瞿曇金剛迦溼彌羅國王子阿順  
證譯修文館大學士李嶠兵部尚書韋嗣立中書侍郎  
趙彥昭吏部侍郎盧藏用兵部侍郎張說中書舍人李  
乂二十餘人次文潤色左僕射韋巨源右僕射蘇瓌監  
護祕書大監嗣虢王邕同監護景雲二年辛亥復於大  
薦福寺譯稱讚如來功德神咒等經太常卿薛崇嗣監



護自天后久視迄睿宗景雲都翻出五十六部二百三十卷又別撰大唐西域求法高僧傳南海寄歸傳內法傳別說罪要行法受用三法水要法護命放生軌儀凡五部九卷又出說一切有部跋闍堵即諸律中犍度跋渠之類蓋梵音有楚夏耳約七十八卷淨雖徧翻三藏而偏攻律部譯綴之暇曲授學徒凡所行事皆尚急護漉囊滌穢特異常倫學侶傳行徧于京洛美哉亦遺法之盛事也先天二年卒春秋七十九法臘五十九糞事

官供所出跋窳堵唯存真本未暇覆疏而逼泥洹然其傳度經律與樊師抗衡比其著述淨多文性傳密咒最盡其妙二三合聲爾時方曉矣今塔在洛京龍門北之高岡焉

系曰譯之言易也謂以所有易所無也譬諸枳橘焉由易土而殖橘化為枳枳橘之呼雖殊而辛芳榦葉無異又如西域尼拘律陀樹即東夏之楊柳名雖不同樹體是一自漢至今皇宋翻譯之人多矣晉魏之際唯西竺

人來止稱尼拘耳此方叅譯之士因西僧指楊柳始體  
言意其後東僧徃彼識尼拘是東夏之柳兩土方言一  
時洞了焉唯西唯東二類之人未為盡善東僧徃西學  
盡梵書解盡佛意始可稱善傳譯者宋齊已還不無去  
彼迴者若入境觀風必聞其政者樊師淨師為得其實  
此二師者兩全通達其猶見璽文知是天子之書可信  
也周禮象胥氏通夷狄之言淨之才智可謂釋門之象  
胥也歟

唐洛陽廣福寺金剛智傳

釋跋日羅菩提華言金剛智南印度摩賴耶國人也華  
言光明其國境近觀音宮殿補陀落迦山父婆羅門善  
五明論為建支王師智生數歲日誦萬言目覽心傳終  
身無忘年十六開悟佛理不樂習尼捷子諸論乃削染  
出家蓋宿植之力也後隨師往中印度那爛陀寺學修  
多羅阿毗達磨等洎登戒法徧聽十八部律又詣西印  
度學小乘諸論及瑜伽三密陀羅尼門十餘年全通三

歲次復遊師子國登楞伽山東行佛誓鰥人等二十餘  
國聞脂那佛法崇盛泛舶而來以多難故累歲方至開  
元己未歲達于廣府勅迎就慈恩寺尋徙薦福寺所住  
之刹必建大曼拏羅灌頂道場度於四衆大智大慧二  
禪師不空三藏皆行弟子之禮焉後隨駕洛陽其年自  
正月不雨迨于五月嶽瀆靈祠禱之無應乃詔智結壇  
祈請於是用不空鈎依菩薩法在所住處起壇深四肘  
舄繪七俱胝菩薩像立期以開光明日定隨雨焉帝使

一行禪師謹密候之至第七日炎氣熾熾天無浮翳午後方開眉眼即時西北風生飛瓦拔樹崩雲泄雨遠近驚駭而結壇之地穿穴其屋洪注道場質明京城士庶皆云智獲一龍穿屋飛去求觀其處日千萬人斯乃壇法之神驗也于時帝留心玄牝未重空門所司希旨奏外國蕃僧遣令歸國行有日矣侍者問智智曰吾是梵僧且非蕃胡不干明勅吾終不去數日忽乘傳將之鴈門奉辭帝大驚下手詔畱住初帝之第二十五公主甚

鍾其愛久疾不救移卧於咸宜外館閉目不語已經旬朔有勅令智授之戒法此乃料其必終故有是命智詣彼擇取宮中七歲二女子以緋繒纏其面目卧於地使牛僊童寫勅一紙焚於他所智以密語咒之二女冥然誦得不遺一字智入三摩地以不思議力令二女持勅詣琰摩王食頃間王令公主亡保母劉氏護送公主魂隨二女至於是公主起坐開目言語如常帝聞之不俟仗衛馳騎往于外館公主奏曰冥數難移今王遣迴畧觀

聖顏而已可半日間然後長逝自爾帝方加歸仰焉武  
貴妃寵異六宮薦施寶玩智勸貴妃急造金剛壽命菩  
薩像又勸河東郡王於毗盧遮那塔中繪像謂門人曰  
此二人者壽非久矣經數月皆如其言凡先覺多此類  
也智理無不通事無不驗經論戒律祕咒餘書隨問剖  
陳如鐘虞受有登其門者智一覲其面永不忘焉至於  
語默興居凝然不改喜怒逆順無有異容瞻禮者莫知  
津涯自然率服矣自開元七年始屆番禺漸來神回廣



敷密藏建曼拏羅依法製成皆感靈瑞沙門一行欽尚  
斯教數就諮詢智一一指授曾無遺隱一行自立壇灌  
頂遵受斯法既知利物請譯流通十一年奉勅於資聖  
寺翻出瑜伽念誦法二卷七俱胝陀羅尼二卷東印度  
婆羅門大首領直中書伊舍羅譯語嵩岳沙門溫古筆  
受十八年於大薦福寺又出曼殊室利五字心陀羅尼  
觀自在瑜伽法要各一卷沙門智藏譯語一行筆受刪  
綴成文復觀舊隋求本中有闕章句加之滿足智所譯

總持印契凡至皆驗秘密流行為其最也兩京稟學濟  
度殊多在家出家傳之相繼二十年壬申八月既望於  
洛陽廣福寺命門人曰白月圓時吾當去矣遂禮毗盧  
遮那佛旋繞七帀退歸本院焚香發願頂戴梵夾并新  
譯教法付囑訖寂然而化壽七十一臘五十一其年十  
一月七日葬於龍門南伊川之右建塔旌表傳教弟子  
不空奏舉勅謚國師之號灌頂弟子中書侍郎杜鴻漸  
素所歸奉述碑紀德焉

系曰五部曼拏羅法攝取鬼物必附麗童男處女去疾除祲也絕易近世之人用是圖身口之利乃寡徵驗率為時所慢吁正法醜薄一至於此

唐京兆大興善寺不空傳

慧朗

釋不空梵名阿目佉跋折羅華言不空金剛止行二字畧也本北天竺婆羅門族幼失所天隨叔父觀光東國年十五師事金剛智三藏初導以梵本悉曇章及聲明論決旬已通徹矣師大異之與受菩薩戒引入金剛界

大曼荼羅驗以擲花知後大興教法洎登具戒善解一切有部諳異國書語師之翻經常令共譯凡學聲明論一紀之功六月而畢誦文殊普賢行願一年之限再夕而終其敏利皆此類也欲求學新瑜伽五部三密法涉于三載師未教詔空擬迴天竺師夢京城諸寺佛菩薩像皆東行寐寤乃知空是真法器遂允所求授與五部灌頂護摩阿闍梨法及毗盧遮那經蘊悉地軌則等盡傳付之厥後師往洛陽隨侍之際遇其示滅即開元二

十年矣影堂既成追謚已畢曾奉遺旨令往五天并師  
子國遂議遐征初至南海郡採訪使劉巨鄰懇請灌頂  
乃於法性寺相次度人百千萬衆空自對本尊祈請旬  
日感文殊現身及將登舟採訪使召誠番禺界蕃客大  
首領伊習賓等曰今三藏往南天竺師子國宜約束船  
主好將三藏并弟子舍光慧智等三七人國信等達彼  
無令疎失二十九年十二月附崑崙舶離南海至訶陵  
國界遇大黑風衆商惶怖各作本國法禳之無驗皆膜

拜求哀乞加救護慧誓等亦慟哭空曰吾今有法汝等勿憂遂右手執五股菩提心杵左手持般若佛母經夾作法誦大隨求一徧即時風偃海澄又遇大鯨出水噴浪若山甚於前患衆商甘心委命空同前作法令慧誓誦婆竭龍王經遂巡衆難俱息既達師子國王遣使迎之將入城步騎羽衛駢羅衢路王見空禮足請住宮中七日供養日以黃金斛滿盛香水王為空躬自洗浴次太子后妃輔佐如王之禮焉空始見普賢阿闍梨遂奉

獻金寶錦繡之屬請開十八會金剛頂瑜伽法門毗盧  
遮那大悲胎藏建立壇法并許舍光慧智等同受五部  
灌頂空自爾學無常師廣求密藏及諸經論五百餘部  
本三昧耶諸尊密印儀形色像壇法幟幟文義性相無  
不盡源一日王作調象戲人皆登高望之無敢近者空  
口誦手印住於慈定當衢而立狂象數頭頃皆踢跌舉  
國奇之次遊五印度境屢彰瑞應至天寶五載還京進  
師子國王尸羅迷伽表及金寶瓔珞般若梵夾雜珠白

欽定四庫全書

宋高宗傳  
卷一

艷等奉勅權止鴻臚續詔入內立壇為帝灌頂後移居淨影寺是歲終夏愆陽詔令祈雨制曰時不得賒雨不得暴空奏立孔雀王壇未盡三日雨已浹洽帝大悅自持寶箱賜紫袈裟一副親為披擐仍賜絹二百匹後因一日大風卒起詔空禳止請銀餅一枚作法加持須臾戢靜忽因池鷺誤觸餅傾其風又作急暴過前勅令再止隨止隨效帝乃賜號曰智藏焉天寶八載許迴本國乘驛騎五匹至南海郡有勅再留十二載勅令赴河隴



節度使哥舒翰所請十三載至武威住開元寺節度使  
洎賓從皆願受灌頂士庶數千人咸登道場弟子舍光  
等亦受五部法別為功德使開府李元琮受法并授金  
剛界大曼荼羅是日道場地震空曰羣心之至也十五  
載詔還京住大興善寺至德初鑾駕在靈武鳳翔空常  
密奉表起居肅宗亦密遣使者求秘密法洎收京反正  
之日事如所料乾元中帝請入內建道場護摩法為帝  
受轉輪王位七寶灌頂上元末帝不豫空以大隨求真

言被除至七過翼日乃瘳帝愈加殊禮焉空表請入山  
李輔國宣勅令於終南山智炬寺修功德念誦之夕感  
大樂薩埵施毫發光以相證驗位隣悉地空曰衆生未  
度吾安自度耶肅宗厭代代宗即位恩渥彌厚譯密嚴  
仁王二經畢帝為序焉頒行之日慶雲俄現舉朝表賀  
永泰元年十一月一日制授特進試鴻臚卿加號大廣  
智三藏大歷三年於興善寺立道場勅賜錦繡褥十二  
領繡羅襦三十二首又賜道場僧二七日齋糧勅近侍

大臣諸禁軍使並入灌頂四年冬空奏天下食堂中置  
文殊菩薩為上座制許之此蓋慊懃陳如是小乘教中  
始度故也五年夏有詔請空往五臺山修功德于時慧  
星出焉法事告終星亦隨沒秋空至自五臺帝以師子  
驄并御鞍轡遣中使出城迎入賜沿道供帳六年十月  
二日帝誕節進所譯之經表云爰自幼年承事先師三  
歲十有四載稟受瑜伽法門復遊五印度求所未授者  
并諸經論計五百餘部天寶五載却至上都上皇詔入

內立灌頂道場所齋梵經盡許翻度肅宗於內立護摩  
及灌頂法累奉二聖令鳩聚先代外國梵文或條索脫  
落者修未譯者譯陛下恭遵遺旨再使翻傳利濟羣品  
起于天寶迄今大歷六年凡一百二十餘卷七十七部  
并目錄及筆受等僧俗名字兼略出念誦儀軌寫畢遇  
誕節謹具進上勅付中外並編入一切經目錄中李憲  
誠宣勅贈空錦綵絹八百疋同翻經十大德各賜三十  
疋沙門潛真表謝僧俗弟子賜物有差又以京師春夏

不雨詔空祈請如三日內雨是和尚法力三日已往而  
需然者非法力也空受勅立壇至第二日大雨云足帝  
賜紫羅衣并雜綵百匹弟子衣七副設千僧齋以報功  
也空進表請造文殊閣勅允奏貴妃韓王華陽公主同  
成之捨內庫錢約三千萬計復翻孽路荼王經宣賜相  
繼旁午道路至九年自春抵夏宣揚妙法誠勗門人每  
語及普賢願行出生無邊法門經勸令誦持再三歎息  
其先受法者偏令屬意觀菩提心本尊大印直詮阿字

了法不生證大覺身若指諸掌重重囑累一夜命弟子  
趙遷持筆硯來吾畧出涅槃茶毗儀軌以貽後代使準  
此送終遷稽首三請幸乞慈悲久住不然衆生何所依  
乎空笑而已俄而示疾上表告辭勅使勞問賜醫藥加  
開府儀同三司封肅國公食邑三千戶固讓不俞空甚  
不悅且曰聖衆儼如舒手相慰白月圓滿吾當逝矣奈  
何臨終更竊名位乃以五股金剛鈴杵先師所傳者并  
銀盤子菩提子水精數珠留別附中使李憲誠進六月

十五日香水澡沐東首倚卧北面瞻望闕庭以大印身  
定中而寂享年七十僧臘五十弟子慧朗次紹灌頂之  
位餘知法者數人帝聞輟視朝三日賜絹布雜物錢四  
十萬造塔錢二百餘萬勅功德使李元琮知護喪事空  
未終前諸僧夢千仞寶臺摧文殊新閣顏金剛杵飛上  
天又興善寺後池無故而涸林竹生實庭花變萎七月  
六日茶毗帝詔高品劉僊鶴就寺置祭贈司空謚曰大  
辯廣正智三藏火滅收舍利數百粒八十粒進內其頂

骨不然中有舍利一顆半隱半現勅於本院別起塔焉  
空之行化利物居多於總持門最彰殊勝測其忍位莫  
定高卑始者玄宗尤推重焉嘗因歲旱勅空祈雨空曰  
過某日可禱之或強得之其暴可怪勅請本師金剛智  
設壇果風雨不止坊市有漂溺者樹木有拔仆者遽詔  
空止之空於寺庭中捏泥媪五六涵水作梵言罵之有  
頃開霽矣玄宗召術士羅公遠與空拈法同在便殿空  
時時反手搔背羅曰借尊師如意時殿上有華石空揮



如意擊碎於其前羅再三取如意不得帝欲起取空曰  
三郎勿起此影耳乃舉手示羅如意復完然在手又北  
邙山有巨蛇樵采者徃徃見之矯首若丘陵夜常承吸  
露氣見空人語曰弟子惡報和尚如何見度每欲翻河  
水陷洛陽城以快所懷也空為其受歸戒說因果且曰  
汝以瞋心故受今那復恚恨乎吾力何及當思吾言此  
身必捨矣後樵子見蛇死澗下臭聞數里空凡應詔祈  
雨無他軌則但設一繡座手簸旋數寸木神子念咒擲

之當其自立於座上已伺其吻角牙出目瞬則雨至矣  
又天寶中西蕃大石康三國帥兵圍西涼府詔空入帝  
御于道場空秉香鑪誦仁王密語二七徧帝見神兵可  
五百員在于殿庭驚問空空曰毗沙門天王子領兵救  
安西請急設食發遣四月二十日果奏云二月十一日  
城東北三十許里雲霧間見神兵長偉鼓角誼鳴山地  
崩震蕃部驚潰彼營壘中有鼠金色咋弓弩弦皆絕城  
北門樓有光明天王怒視蕃帥大奔帝覽奏謝空因勅

諸道城樓置天王像此其始也空既終三朝所賜墨制  
一皆進納生榮死哀西域傳法僧至此今古少類矣嗣  
其法位慧朗師也御史大夫嚴郢為碑徐浩書之樹於  
本院焉

系曰傳教令輪者東夏以金剛智為始祖不空為二祖  
慧朗為三祖已下宗承所損益可知也自後岐分派別  
咸曰傳瑜伽大教多則多矣而少驗者何亦猶羽嘉生  
應龍應龍生鳳皇鳳皇已降生庶鳥矣欲無變革其可

得乎

宋高僧傳卷一

欽定四庫全書

宋高僧傳卷二

宋 釋贊寧 撰

譯經篇第一之二

正傳十五人  
附見八人

唐洛京聖善寺善無畏傳

達摩  
掬多

釋善無畏本中印度人也釋迦如來季父甘露飯王之  
後梵名戍婆揭羅僧訶華言淨師子義翻為善無畏一  
云輸波迦羅此名無畏亦義翻也其先自中天竺因國

難分王烏荼父曰佛手王以畏生有神姿宿齋德藝故  
歷試焉十歲統戎十三嗣位得軍民之情昆弟嫉能稱  
兵構亂閱牆斯甚薄伐臨戎流矢及身掉輪傷頂天倫  
既敗軍法宜誅大義滅親忍而曲赦乃投淚白母及告  
羣臣曰向者親征恩已斷矣今欲讓國全其義焉因致  
位於兄固求入道母哀許之密與傳國寶珠猶諸侯之  
分器也南至海濱遇殊勝招提得法華三昧聚沙為塔  
僅一萬所黑蛇傷指而無退息復寄身商船往遊諸國

密修禪誦口放白光無風三日舟行萬里屬商人遇盜  
危於併命畏恤其徒侶默諷真言七俱胝尊全身相  
羣盜果為他寇所殲寇乃露罪歸依指蹤夷險尋越窮  
荒又逾毒水纔至中天竺境即遇其王王之夫人乃畏  
之女兒也因問捨位之由稱歎不足是日攜手同歸慈  
雲布陰一境丕變畏風儀爽俊聰叡超羣解究五乘道  
該三學總持禪觀妙達其源藝術伎能悉聞精練初詣  
那爛陀寺此云施無厭也像法之泉源衆聖之會府畏

乃捨傳國寶珠璽于大像之額畫如月魄夜若曦輪焉  
寺有達摩掬多者掌定門之祕鑰佩如來之密印顏如  
四十許其實八百歲也玄奘三藏昔曾見之畏投身接  
足奉為本師一日侍食之次旁有一僧震旦人也畏現  
其鉢中見油餌尚溫粟飯猶暖愕而歎曰東國去此十  
萬餘里是彼朝熟而返也掬多曰汝能不言真可學焉  
後乃授畏總持瑜伽三密教也龍神圍遶森在目前其  
諸印契一時頓受即日灌頂為人天師稱曰三藏夫三



藏之義者則內為戒定慧外為經律論以陀羅尼總攝  
之也陀羅尼者是菩提速疾之輪解脫吉祥之海三世  
諸佛生於此門慧照所傳一燈而已根殊性異燈亦無  
邊由是有百億釋迦微塵三昧菩薩以網總攝於諸定  
頃升階位隣於大覺此其旨也于時畏周行大荒徧禮  
聖迹不憚艱險凡所履處皆三返焉又入雞足山為迦  
葉剃頭受觀音摩頂嘗結夏於靈鷲有猛獸前導深入  
山穴穴明如晝見牟尼像左右侍者如生焉時中印度

大旱請畏求雨俄見觀音在日輪中手執軍持注水於地時衆欣感得未曾有復鍛金如貝葉寫大般若經鎔中金為窣覩波等佛身量焉母以畏遊方日久謂為已歿旦夕泣淚而喪其明洎附信問安朗然如故五天之境自佛滅後外道崢嶸九十六宗各專其見畏皆隨所執破滯析疑解邪縛於心門捨迷津於覺路法雲大小而均澤定水方圓而任器什異學之旗鼓建心王之勝幢使彼以念制狂即身觀佛掬多曰善男子汝與震旦

有緣今可行矣畏乃頂辭而去至迦濕彌羅國薄暮次河而無橋梁畏浮空以濟一日受請於長者家俄有羅漢降曰我小乘之人大德是登地菩薩乃讓席推尊畏施之以名衣升空而去畏復至烏菴國有白鼠馴遶日獻金錢講毗盧於突厥之庭安禪定於可散之樹法為金字列在空中時突厥宮人以手按乳乳為三道飛注畏口畏乃合掌端容曰我前生之母也又途中遭寇舉及三斫而肢體無傷揮劍者唯聞銅聲而已前登雪山

大池畏不念掬多自空而至曰菩薩身同世間不捨生死汝久離相寧有病耶言訖沖天畏洗然而愈路出吐蕃與商旅同次胡人貧貨率衆合圍畏密運心印而蕃豪請罪至大唐西境夜有神人曰此東非弟子界也文殊師利實護神州禮足而滅此亦猶迦毗羅神送連眉也畏以駝負經至西州涉于河龍陷駝足沒于泉下畏亦入泉三日止住龍宮宣揚法化開悟甚衆及牽駝出岸經無沾濕焉初畏途過北印度境而聲譽已達中國

睿宗乃詔若耶及將軍史獻出玉門塞表以候來儀開  
元初玄宗夢與真僧相見姿狀非常躬御丹青寫之殿  
壁及畏至此與夢合符帝悅有緣飾內道場尊為教主  
自寧薛王已降皆跪席捧器焉賓大士於天宮接梵筵  
於帝座禮國師以廣成之道致人主於如來之乘巍巍  
法門於斯為盛時有術士握鬼神之器叅變化之功承  
詔御前角其神異畏恬然不動而術者手足無所施矣  
開元四年丙辰齋梵夾始屆長安勅於興福寺南院安

置續宣住西明寺問勞重疊錫貺異常至五年丁巳奉  
詔於菩提院翻譯畏奏請名僧同叅華梵開題先譯虛  
空藏求聞持法一卷沙門悉達譯語無著筆受綴文繕  
寫進內帝深加歎賞有勅畏所將到梵本並令進上昔  
有沙門無行西遊天竺學畢言歸方及北印不幸而卒  
其所獲夾葉悉在京都華嚴寺中畏與一行禪師於彼  
選得數本並總持妙門先所未譯十二年隨駕入洛復  
奉詔於福先寺譯大毗盧遮那經其經具足梵文有十

萬頌畏所出者撮其要耳曰大毗盧遮那成佛神變加  
持經七卷沙門寶月譯語一行筆受刪綴辭理文質相  
半妙諧深趣上符佛意下契根緣利益要門斯文為最  
又出蘓婆呼童子經三卷蘓悉地揭羅經三卷二經具  
足咒毗柰耶也即祕密禁戒焉若未曾入曼荼羅者不  
合輒讀誦猶未受人盜聽戒律也所出虛空藏菩薩  
能滿諸願最勝心陀羅尼求聞持法一卷即金剛頂梵  
本經成就一切義圖畧譯少分耳畏性愛恬簡靜慮怡

神時開禪觀獎勸初學奉儀形者蓮華敷於眼界稟言  
說者甘露潤於心田超然覺明日有人矣法侶請謁唯  
尊奉長老寶思惟三藏而已此外皆行門人之禮焉一  
行禪師者帝王宗重時賢所歸定慧之餘陰陽之妙有  
所未決亦咨稟而後行畏嘗於本院鑄銅為塔手成模  
範妙出人天寺衆以銷冶至廣庭除深隘慮風至火盛  
灾延寶坊畏笑曰無苦自當知也鼓鑄之日果大雪蔽  
空靈塔出鑪瑞花飄席衆皆稱歎焉又屬暑天亢旱帝



遣中官高力士疾召畏祈雨畏曰今旱數當然也若苦  
召龍致雨必暴適足所損不可為也帝強之曰人苦暑  
病矣雖風雷亦足快意辭不獲已有司為陳請雨具旂  
幢螺鈸備焉畏笑曰斯不足以致雨急撤之乃盛一鉢  
水以小刀攪之梵言數百咒之須臾有物如龍其大如  
指赤色矯首瞰水面復潛于鉢底畏且攪且咒頃之有  
白氣自鉢而興逕上數尺稍稍引去畏謂力士曰亟去  
雨至矣力士馳去迴顧見白氣疾旋自講堂而西若一

匹素翻空而上既而昏霾大風震電力士纔及天津橋  
風雨隨馬而驟街中大樹多拔焉力士入奏而衣盡霑  
濕矣帝稽首迎畏再三致謝又邛山有巨蛇畏見之歎  
曰欲決豬洛陽城耶以天竺語咒數百聲不日蛇死乃  
安祿山陷洛陽之兆也一說畏曾寓西明道宣律師房  
示為麤相宣頗嫌鄙之至中夜宣捫蝨投于地畏連呼  
律師撲死佛子宣方知是大菩薩詰旦攝衣作禮焉若  
觀此說宣滅至開元中僅五十載矣如畏出沒無常非

人之所測也二十年求還西域優詔不許二十三年乙亥十月七日右脅累足奄然而化享齡九十九僧臘八十法侶淒涼皇心震悼贈鴻臚卿遣鴻臚丞李現具威儀賓律師護喪事二十八年十月三日葬於龍門西山廣化寺之庭焉定慧所熏全身不壞會葬之日涕泗傾都山川變色僧俗弟子寶畏禪師明畏禪師滎陽鄭氏琅邪王氏痛其安仰如喪考妣焉乾元之初唐風再振二禪師刻偈諸信士營龕弟子舍于旁有同孔墓之戀

今觀畏之遺形漸皆縮小黑皮隱隱骨其露焉累朝旱  
澇皆就祈請徵驗隨生且多檀施錦繡巾帔覆之如偃  
息耳每一出龕置于低榻香汁浴之洛中豪右爭施禪  
帔淨巾澡豆以資浴事上襍禱多遣使臣往加供施必  
稱心願焉

唐洛京智慧傳

釋智慧者梵名般若刺若也姓憍答摩氏北天竺迦畢試  
國人穎悟天資七歲發心違侍二親歸依三寶時從大

德調伏軍教誦四阿含滿十萬頌阿毗達摩三萬頌及  
年應法隨師徃別國納具足戒誦薩婆多近四萬頌俱  
舍二萬八千頌又誦大婆沙兼通其義七年於彼專習  
小乘後詣中天竺那爛陀寺稟學大乘唯識瑜伽中邊  
等論金剛般若經因明聲明醫明王律論等並依承智  
護進友智友三大論師復遊雙林經八塔徃來瞻禮十  
有八年聞南北竺頗尚持明遂徃諮稟彼有灌頂師名  
達摩耶舍見慧勤重可教授瑜伽法入曼荼羅三密護

身五部印契經于一年誦徹三千五百餘頌常聞支那  
大國文殊在中錫指東方誓傳佛教乃泛海東邁垂至  
廣州風飄却返抵執師子國之東又集資糧重修巨舶  
徧歷南海諸國二十二年再近番禺風濤遽作舶破人  
沒唯慧存焉夜至五更其風方止所齋經論莫知所之  
及登海壖其夾策已在岸矣於白沙內大竹筍中得之  
宛為鬼物扶持而到乃歎曰此大乘理趣等經想支那  
人根熟矣遂東北行半月達廣州即德宗建中初也屬

帝違難奉天貞元二年始屆京輦見鄉親神策軍正將  
羅好心即慧舅氏之子也悲喜相慰將至家中延留供  
養八年上表舉慧翻傳有勅令京城諸寺大德名業殊  
衆者同譯得罽賓三藏般若開釋梵本翰林待詔光宅  
寺沙門利言度語西明寺沙門圓照筆受資聖寺道液  
西明寺良秀莊嚴寺應真醴泉寺超悟道岸智空並充  
證義六月八日欲朔經題勅右街功德使王希遷與右  
神策軍大將軍王孟涉驃騎大將軍馬有隣等送梵經

出內緇伍威儀樂部相間士女觀望車騎交駢迎入西明寺翻譯即日賜錢一千貫茶三十串香一大合充其供施開名題曰大乘理趣六波羅蜜多經成十卷又華嚴長者問佛那羅延力經般若心經各一卷皆貞元八年所譯也是歲十月繕寫畢二十八日設綵車大備威儀引入光順門進帝覽忻然慰勞動至勅於神策軍賜齋食賜慧絹五百匹冬服一副餘人賜各有差慧表謝答詔褒美同日請譯經奉天定難功臣開府儀同三司



檢校太子詹事羅好心上表云臣表弟沙門般刺若先  
進大乘理趣六波羅蜜梵本經伏奉今年四月十九日  
勅令王希遷精選有道行僧於西明寺翻譯今經帙已  
終同詣光順門進上答詔云卿之表弟早悟大乘遠自  
西方來遊上國宣六根之奧義演雙樹之微言念以精  
誠所宜欽重是令翻譯俾用流行卿夙慕忠勤職司禁  
衛省覽表疏具見乃懷所謝知好心以朱泚圍逼之際  
頗有戰功預其中兵為帝寵重慧得好心啓導譯務有

光帝製經序焉慧後終于洛陽葬龍門之西岡塔今存矣

唐玉華寺玄覺傳

釋玄覺高昌國人也西土種姓未得聞焉學慕大乘從  
玄奘三藏研覈經論亦於玉華宮叅預翻譯及大般若  
經向就同請翻寶積經奘辭憊然覺因夢一浮圖莊嚴  
高大忽然摧倒遂驚起告奘奘曰非汝身事此吾滅之  
徵耳覺暗悲安做勸諸法侶競求醫藥覺後莫測終焉

唐益州多寶寺道因傳

嵩公  
寶暹

釋道因姓侯氏濮陽人也稟祐居醇含章縱哲覃訏之  
歲粹采多奇髫鬣之辰殊姿特茂孝愛之節慈順之風  
率志于斯因心以極年甫七歲丁于內艱啗粒絕漿殆  
乎滅姓成人之德見梅州里免喪之後思酬罔極出家  
之志人莫我移便詣靈巖寺求師誦習曾不決旬通涅槃  
經二帙舉衆驚駭謂為神童落髮已來砥礪其行揣  
摩義章即講涅槃宿齒名流咸所歎服及升上品旋學

律儀又於彭城嵩法師所傳攝大乘嵩公懿德玄猷蘭  
薰月映門徒學侶魚貫趨講室談筵為之囂隘遂依  
科戒而為節文年少沙門且令習律曉四分者方許入  
聽因夏臘雖幼業行攸高獨於衆中迴見推揖每敷攝  
論即令覆講後隱泰嶽凡經四秋將詣洛中屬昏季陵  
夷法網嚴峻僧無徒侶弗許遊方於是杖錫出山牙馬  
超邁恐罹刑憲靜念觀音少選之間有僧款至皓然白  
首請與偕行迨至銅街暨於金地俯仰之際莫知所在

咸謂善逝之力有感斯見未幾因避難三蜀居于多寶  
寺好事者素聞道譽乃命開筵攝論維摩聽者千數時  
有寶暹法師東海人也殖藝該洽尤善大乘昔在隋朝  
英塵久播學徒來請接武摩肩暹公傲爾其間仰之彌  
峻每至因之論席肅然改容沈吟久之方用酬遣因抗  
音馳辯雷驚波注盡妙窮微巖牙折角益州總管鄧國  
公竇璡行臺左僕射贊國公竇軌長史申國公高士康  
范陽公盧承慶及前後首僚西南岳牧並國華朝秀重

望崇班共籍芳聲俱申虔仰乃於彭門山寺習道安居  
此寺往經廢毀院宇凋弊因慨然構懷專事營葺未移  
再稔蔚成淨場又以九部微言三界式仰緬惟法盡將  
翳龍宮遂於寺之北巖刻書經典窮多羅之秘袞盡毗  
尼之正文縱堯世之洪水襄陵任趙簡之北山燎狩必  
無他慮與劫齊休既而清猷遠暢峻業遐昭遂簡宸衷  
乃紆天綍追赴京邑止大慈恩寺與玄奘法師翻譯校  
定梵本兼充證義奘師偏獎賞之每有難文同加參酌

新翻弗墜因有力焉慧日寺主楷法師者聰爽溫瞻聲  
藹鴻都首建法筵請開奧義帝城縉俗具來諮稟欣焉  
相顧得所未聞因研幾史籍尤好老莊咀其菁華含其  
腴潤包四始於風律綜五聲於文緒故所講訓內外該  
通其專業者涅槃華嚴大品維摩法華楞伽等經十地  
地持毗曇智度攝大乘對法佛地等論及四分等律其  
攝論維摩仍著章疏已而能事畢矣示疾終于長安慧  
日寺則顯慶三年三月十一日也春秋七十二越明年

正月旋神座于益部二月八日寔于彭門光化寺石經之側道俗送奠數有數千弟子玄凝等嗣其香火至龍朔中中臺司藩大夫李儼製碑歐陽通書焉

唐波凌國智賢傳會寧

釋若耶跋陀羅華言智賢南海波凌

亦曰訶凌

國人也善三

藏學麟德年中有成都沙門會寧欲往天竺觀禮聖迹泛舶西遊路經波凌遂與智賢同譯涅槃後分二卷此於阿笈摩經內譯出說世尊焚棺收設利羅等事與大



涅槃頗不相涉譯畢寄經達交州寧方之西域至儀鳳  
年初交州都督梁難敵遣使同會寧弟子運期奉表進  
經入京三年戊寅大慈恩寺沙門靈會於東宮啓請施  
行運期奉侍其師因心莫比師令齋經行化故無暇影  
隨往西域也

唐洛京白馬寺覺救傳

釋佛陀多羅華言覺救北天竺罽賓人也齋多羅夾誓  
化支那止洛陽白馬寺譯出大方廣圓覺了義經此經

近譯不委何年且隆道為懷務甄詐妄但真詮不謬豈  
假具知年月耶救之行迹莫究其終太和中圭峯密公  
著疏判解經本一卷後分二卷成部續又為鈔演暢幽  
邃今東京太原三蜀盛行講演焉

唐五臺山佛陀波利傳

順貞

釋佛陀波利華言覺護北印度罽賓國人忘身徇道徧  
觀靈跡聞文殊師利在清涼山遠涉流沙躬來禮謁以  
天皇儀鳳元年丙子杖錫五臺虔誠禮拜悲泣雨淚冀

觀聖容倏焉見一老翁從山而出作婆羅門語謂波利  
曰師何所求耶波利答曰聞文殊大士隱迹此山從印  
度來欲求瞻禮翁曰師從彼國將佛頂尊勝陀羅尼經  
來否此土衆生多造諸罪出家之輩亦多所犯佛頂神  
咒除罪祕方若不齋經徒來何益縱見文殊亦何能識  
師可還西國取彼經來流傳此土即是徧奉衆聖廣利  
羣生拯接幽冥報諸佛恩也師取經來至弟子當示文  
殊居處波利聞已不勝喜躍裁抑悲淚向山更禮舉頭

之頃不見老人波利驚愕倍增虔恪遂返本國取得經  
迴既達帝城便求進見有司具奏天皇賞其精誠崇斯  
祕典下詔鴻臚寺典客令杜行顗與日照三藏於內共  
譯譯訖覲絹三十匹經留在內波利垂泣奏曰委棄身  
命志在利人請帝流行是所望也帝愍其專切遂留所  
譯之經還其梵本波利得經彌復忻喜乃向西明寺訪  
得善梵語僧順貞奏乞重翻帝俞其請波利遂與順貞  
對詣大德翻出名曰佛頂尊勝陀羅尼經與前杜令所

譯者咒韻經文少有同異波利所願既畢却持梵本入  
于五臺莫知所之或云波利隱金剛窟今永興龍首岡  
有波利藏舍利之所焉大厯中南嶽雲峯寺沙門法照  
入五臺山禮金剛窟夜之未央剋責撲地忽見一僧長  
七尺許梵音朗暢稱是佛陀波利問曰阿師如此自苦  
得無勞乎有何願樂照對曰願見文殊曰若志力堅強  
真實無妄汝可脫履於板上跏趺聖顏令子得見照遂  
瞑目俄已入窟見一院題額云金剛般若寺字體簡健

光色閃爍其院皆是異寶莊嚴名目不暇樓觀複沓殿  
宇連延果惡密緻鈴鐸交鳴可二百所間有祕藏中緘  
金剛般若并一切經法人物魁偉殆非常所覩也文殊  
大聖處位尊嚴擁從旁午宣言慰勞分茶賦食訖波利  
引之出去照苦乞在寺波利不許臨別勉之努力修進  
再來可住照還至板上躡履迴眸之際波利隱焉

系曰道家尸解說有多端或隱真形而存假質矧以登  
地大士漏盡羅漢或此在他亡或分身易態皆以之為

遊戲耳以之為利物焉其佛陀波利出沒無恒變化何  
極出金剛窟接法照師蓋與之有緣闔然而現故杜多  
迦葉久隱諸峯音法顯往遊靈鷲見于山下焉

唐尊法傳

釋尊法西印度人也梵云伽梵達磨華云尊法遠踰沙  
磧來抵中華有傳譯之心堅化導之願天皇永徽之歲  
翻出千手千眼觀世音菩薩廣大圓滿無礙大悲心陀  
羅尼經一卷經題但云西天竺伽梵達磨譯不標年代

推其本末疑是永徽顯慶中也又準十臂經序云智通同此三藏譯也法後不知其終

唐西京慧日寺無極高傳

阿難律本又師迦葉師

釋無極高中印度人梵云阿地瞿多華云無極高也出家氏族未憑書之高學窮滿字行潔圓珠精練五明妙通三藏永徽三年壬子歲正月自西印度齋梵來來屆長安勅令慈門寺安置沙門大乘琮等十六人英公李世勣鄂公尉遲敬德等十二人同請高於慧日寺浮圖院



建陀羅尼普集會壇所須供辦法成之日屢現靈異京  
中道俗咸歎希逢沙門玄楷等固請翻其法本以四年  
癸丑至於五年於慧日寺從金剛大道場經中撮要而  
譯集成一部名陀羅尼集經一十二卷玄楷筆受于時  
有中印度大菩提寺阿難律木叉師迦葉師等於經行  
寺譯功德天法編在集經第十卷內故不別出焉

唐廣州制止寺極量傳

釋極量中印度人也梵名般刺蜜帝此言極量懷道觀

方隨緣濟物展轉遊化漸達支那

印度俗呼廣府為支那名帝京為摩訶支

也那乃於廣州制止道場駐錫衆知博達祈請頗多量以

利樂為心因敷祕牘神龍元年乙巳五月二十三日於

灌頂部中誦出一品名大佛頂如來密因修證了義諸

菩薩萬行首楞嚴經譯成一部十卷烏菴國沙門彌伽

釋迦

釋迦稍訛正云錄佐此曰雲峯

譯語菩薩戒弟子前正議大夫同

中書門下平章事清河房融筆受循州羅浮山南樓寺

沙門懷迪證譯量翻傳事畢曾本國王怒其擅出經本

遣人追攝泛舶西歸後因南使入京經遂流布有惟懋  
法師資中沈公各著疏解之

唐洛京大徧空寺實又難陀傳

釋實又難陀一云施乞又難陀華言學喜慈嶺北于闐  
人也智度恢曠風格不羣善大小乘旁通異學天后明  
揚佛日崇重大乘以華嚴舊經處會未備遠聞于闐有  
斯梵本發使求訪并請譯人又與經夾同臻帝闕以證  
聖元年乙未於東都大內大徧空寺翻譯天后親臨法

座煥發序文自運仙毫首題名品南印度沙門菩提流  
志沙門義淨同宣梵本後付沙門復禮法藏等於佛授  
記寺譯成八十卷聖歷二年功畢至久視庚子駕幸潁  
川三陽宮詔又譯大乘入楞伽經天后復製序焉又於  
京師清禪寺及東都佛授記寺譯文殊授記等經前後  
總出一十九部沙門波崙玄軌等筆受沙門復禮等級  
文沙門法寶恒景等證義太子中舍賈膺福監護長安  
四年又以母氏哀老思歸慰覲表書再上方俞勅御史

霍嗣光送至于闔暨和帝龍興有勅再徵景龍二年達  
于京輦帝屈萬乘之尊親迎於開遠門外傾都緇侶備  
幡幢導引仍飾青象令乘之入城勅於大薦福寺安置  
未遑翻譯邁疾彌留以景雲元年十月十二日右脅累  
足而終春秋五十九歲有詔聽依外國法葬十一月十  
二日於開遠門外古然燈臺焚之薪盡火滅其古猶存  
十二月二十三日門人悲智勅使哥舒道元送其餘骸  
及斯靈舌還歸于闔起塔供養後人復於茶毗之所起

七層塔土俗號為華嚴三藏塔焉

周西京廣福寺日照傳

釋地婆訶羅華言日照中印度人也洞明八藏博曉五  
明戒行高奇學業勤悴而咒術尤工以天皇時來遊此  
國儀鳳四年五月表請翻度所齋經夾仍準玄奘例於  
一大寺別院安置并大德三五人同譯至天后垂拱末  
於兩京東西太原寺

西太原寺後改西崇福寺  
東太原寺後改大福先寺及西京

廣福寺譯大乘顯識經大乘五蘊論等凡一十八部沙

門戰陀般若提婆譯語沙門慧智證梵語勅諸名德助  
其法化沙門道成薄塵嘉尚圓測靈辨明恂懷度證義  
沙門思玄復禮綴文筆受天后親敷睿藻製序冠首焉  
照嘗與覺護同翻佛頂深體唐言善傳佛意每進新經  
錫賚豐厚後終於翻經小房享年七十五天后勅葬于  
洛陽龍門香山塔見存焉

周洛京魏國東寺天智傳

釋提雲般若或云提雲陀若那華言天智于闐國人也

學通大小解兼真俗咒術禪門無不諳曉永昌元年來

屆於此謁天后於洛陽勅令就魏國東寺

後改大周東寺翻譯

即以其年己丑至天授二年辛卯出華嚴經法界無差

別論等六部七卷沙門處一筆受沙門復禮綴文沙門

德感慧儼法明恒景等證義智終年卒地莫得而聞

周洛京佛授記寺慧智傳

明佐

釋慧智其父印度人婆羅門種因使遊北方而生於洛智少而精勤有出俗之志天皇時從長年婆羅門僧奉勅




度為弟子本既梵人善閑天竺書語生于唐國復練此  
土言音三藏地婆訶羅提雲若那寶思惟等所有翻譯  
皆白智為證兼令度語後至長壽二年癸巳智於東都  
佛授記寺自譯觀世音頌一卷不詳所終有沙門明佺  
者不知何許人出家肄業悉在佛授記寺尤善毗尼兼  
閑經論天冊萬歲元年勅令判定經目佺所專纂錄編  
次持疑更與翻經大德二十餘人同共叅正號曰大周  
經錄焉智昇云雖云判定繁穢尤多徒見流行實難憑

準蓋此錄支經別品雜皆不倫致為昇公之所黜矣

周洛京寂友傳

釋彌陀山華言寂友觀貨邏國人也自幼出家遊諸印  
度徧學經論楞伽俱舍最為窮覈志傳像法不悞鄉邦  
杖錫孤征來臻諸夏因與實叉難陀共譯大乘八楞伽  
經又天授中與沙門法藏等譯無垢淨光陀羅尼經一  
卷其經佛為劫比羅戰荼婆羅門說延其壽命譯畢進  
內尋辭帝歸鄉天后以厚禮餞之



宋高僧傳卷二

欽定四庫全書

子部  
宋高僧傳卷三

詳校官監察御史臣王爾烈

檢討臣何思鈞覆勘

總校官編修臣王燕緒

校對官編修臣馬啟泰

謄錄監生臣范來泰

欽定四庫全書

宋高僧傳卷三

宋 釋贊寧 撰

譯經篇第一之三

正傳十四人  
附見三人

唐京師總持寺智通傳

釋智通姓趙氏本陝州安邑人也隋大業中出家受具  
後隸名總持寺律行精明經論該博自幼挺秀即有遊  
方之志因往洛京翻經館學梵書并語曉然明解屬貞

觀中有北天竺僧齋到千臂千眼經梵本太宗勅搜天下僧中學解者充翻經館綴文筆受證義等通應其選與梵僧對譯成二卷天皇永徽四年復於本寺出十轉陀羅尼觀世音菩薩咒一卷觀自在菩薩隨心咒一卷清淨觀世音菩薩陀羅尼一卷共四部五卷通善其梵字復究華言敵對相翻時皆推伏又云行瑜伽祕密教大有感通後不知所終

唐京師奉恩寺智嚴傳

釋智嚴姓尉遲氏本于閬國質子也名樂受性聰利隸  
鴻臚寺授左領軍衛大將軍上柱國封金滿郡公而深  
患塵勞唯思脫屣神龍二年五月奏乞以所居宅為寺  
勅允題榜曰奉恩是也相次乞捨官入道十一月二十  
四日墨制聽許景龍元年十一月五日孝和帝誕節剃  
染尋奉勅於此寺翻經多證梵文諸經成部嚴有力焉  
嚴重譯出生無邊法門陀羅尼經後於石鼈谷行頭陀  
法又充終南山至相寺上座體道用和率從清謹不知



其終

唐洛京天竺寺寶思惟傳

釋阿你真那華言寶思惟北印度迦濕密羅國人刹帝利種幼而捨家禪誦為業進具之後專精律品而慧解超羣學兼真俗乾文咒術尤攻其妙加以化導為心無戀鄉國以天后長壽二年屈于洛都勅於天宮寺安置即以其年創譯至中宗神龍景午於佛授記天宮福先等寺出不空罽索陀羅尼經等七部睿宗太極元年四

月太子洗馬張齊賢等繕寫進內其年六月勅令禮部  
尚書晉國公薛稷右常侍高平侯徐彥伯等詳定八目  
施行那自神龍之後不務翻譯唯精勤禮誦修諸福業  
每於晨朝磨香為水塗浴佛像後方飲食從始洎終此  
為恒業衣鉢之外隨得隨施後於龍門山請置一寺制  
度皆依西域因名天竺馬門徒學侶同居此寺精誠所  
感靈應實繁壽百有餘歲以開元九年終於寺構塔旌  
表焉

唐洛京長壽寺菩提流志傳

釋菩提流志南天竺國人也淨行婆羅門種姓迦葉氏  
年十二就外道出家事波羅奢羅學聲明僧佉等論歷  
數咒術陰陽識緯靡不該通年逾耳順方乃迴心知外  
法之乖違悟釋門之淵默隱居山谷積習頭陀初依耶  
舍瞿沙三藏學諸經論其後遊歷五天徧請講肄高宗  
大帝聞其遠譽挹彼高風永淳二年遣使迎接天后復  
加鄭重令住東洛福先寺譯佛境界寶雨華嚴等經凡

十一部中宗神龍二年又住京兆崇福寺譯大寶積經  
屬孝和厭代睿宗登極勅於北苑白蓮池甘露亭續其  
譯事翻度云畢御序冠諸其經舊新凡四十九會總一  
百二十卷先天二年四月八日進內此譯場中沙門思  
忠天竺大首領伊舍羅等譯梵文天竺沙門波若屈多  
沙門達摩證梵義沙門履方宗一慧覺筆受沙門深亮  
勝莊塵外無著懷迪證義沙門承禮雲觀神暕道本次  
文次有潤文官盧瓘學士徐堅中書舍人蘇瓚給事中

崔璩中書門下三品陸象先尚書郭元振中書令張說  
侍中魏知古儒釋二家構成全美寶積用賢既廣流志  
運功最多所慊者古今共譯一切陀羅尼末句云莎縛  
訶皆不竊考清濁遂使命章有異或云薩婆訶或云馭  
瞞訶等九呼不倫楷定梵音悉無本旨此非梵僧傳誦  
不的自是執筆之誤故剋取莎桑巴縛無可反訶呼箇爲反  
正矣志開元十二年隨駕居洛京長壽寺十五年十一  
月四日囑戒弟子五日齋時令侍人散去右脅安卧奄

然而卒春秋一百五十六帝間軫悼勅試鴻臚卿謚曰  
開元一切徧知三藏遣內侍杜懷信監護喪事出內庫  
物務令優贍用鹵簿羽儀獐幢花蓋聞塞衢路十二月  
一日遷窆于洛南龍門西北原起塔勒石誌之

系曰西域喪禮其太簡乎或有國王酋長傾心致重者  
勿過昇之火葬若東夏僧用鹵簿道喪車罕聞之矣嗚  
呼道尊德貴不言而邀此不其盛歟

唐羅浮山石樓寺懷迪傳

般若力善  
部末摩

釋懷迪循州人也先入法于南樓寺其山半在海涯半連陸岸乃仙聖遊居之靈府也迪久探經論多所該通七畧九流粗加尋究以海隅之地津濟之前數有梵僧寓止于此迪學其書語自茲通利菩提流志初譯寶積名迪至京證義事畢南歸後於廣府遇一梵僧齋多羅葉經一夾請共翻傳勒成十卷名大佛頂萬行首楞嚴經是也迪筆受經旨緝綴文理後因南使附經入京即開元中也又乾元元年有蜀賓三藏般若力中天竺婆

羅門三藏善部末摩箇失密三藏舍那並慕化入朝詔  
以力為太常少卿末摩為鴻臚少卿並員外置放還本  
土或云各齋經至屬燕趙阻兵不遑宣譯故以官品榮  
之

唐京兆慈恩寺寂默傳

釋牟尼室利華言寂默其為人也神宇高爽量度真率  
德宗貞元九年發那爛陀寺擁錫東來自言從北印度  
往此寺出家受戒學法焉十六年至長安興善寺十九



年徙崇福醴泉寺復於慈恩寺請行翻譯事乃將樊師  
梵本出守護國界主陀羅尼經十卷又進六塵獸圖帝  
悅擅施極多元和元年六月十九日卒于慈恩寺初默  
說中天竺摩伽陀國那爛陀寺周圍四十八里九寺一  
門是九天王所造默在寺日住者萬餘以大法師處量  
綱任西域伽藍無如其高廣矣案守護國界主經是般  
若譯牟尼證梵本翰林待詔光宅寺智真譯語圖照筆  
受鑒虛潤文澄觀證義焉

唐丘慈國蓮華寺蓮華精進傳

釋勿提提羸魚華言蓮華精進本屈支城人也即龜茲國亦云丘慈正曰屈支時唐使車奉朝到彼土城西門外有蓮華寺進居此中號三藏苾芻奉朝至誠祈請開譯梵夾傳歸東夏進允之遂譯出十力經可用東紙三幅成一卷是佛在舍衛國說安西境內有前踐山山下有伽藍其水滴溜成音可愛彼人每歲一時采綴其聲以成曲調故耶婆瑟雞開亢中用為羯鼓曲名樂工最

難其杖撿之術進寺近其滴水也其經是沙門悟空同  
十地迴向輪經共十一卷齋進貞元中請編入藏值圓  
照續錄故述其由

唐北庭龍興寺戒法傳

釋尸羅達摩華言戒法也本于闐人學業該通善知華  
梵居于是國為大法師唐貞元中悟空迴至北庭其本  
道節度使楊襲古與龍興寺僧請法為譯主翻十地經  
法躬讀梵文并譯語沙門大震筆受法超潤文善信證

義悟空證梵文又譯迴向輪經翻傳纔畢繕寫欲終遇  
北庭宣慰中使段明秀事訖迴與北庭奏事官牛昕安  
西奏事官程鶚等相隨入朝為沙河不通取回鵲路其  
梵夾留北庭龍興寺藏齋所譯唐本至京即貞元五載  
也法譯事方終却迴豁丹豁丹一云于遁此皆嶺北人  
之呼名耳若五印度語云瞿薩怛那華言乳國亦云地  
乳也

唐蓮華傳

釋蓮華本中印度人也以興元元年杖錫謁德宗乞鐘一口歸天竺聲擊勅廣州節度使李復修鼓鑄畢令送於南天竺金埵寺華乃將此鐘於寶軍國毗盧遮那塔所安置後以華嚴後分梵夾附舶來為信者般若三藏於崇福寺翻成四十卷焉一云梵夾本是南天竺烏荼國王書獻支那天子書云手自書寫華嚴經百千偈中所說善財童子五十五聖者善知識入不思議解脫境界普賢行願品謹奉進上願於龍華會中奉覲云卽貞

元十一年也至十二年六月詔於崇福寺翻譯罽賓沙  
門般若宣梵文洛京天宮寺廣濟譯語西明寺圓照筆  
受智柔智通綴文成都府正覺寺道恒鑒虛潤文千福  
寺大通證義澄觀靈邃詳定神策軍護軍中尉霍仙鳴  
左街功德使竇文場寫進十四年二月解座

唐大聖千福寺飛錫傳

釋飛錫未知何許人也神氣高邈識量過人初學律儀  
後於天台法門一心三觀與沙門楚金棲心研習天寶

初遊于京闕多止終南紫閣峯草堂寺屬不空當途傳  
譯慎選英髦錫預其數頻登筆受潤文之任代宗永泰  
元年四月十五日奉詔於大明宮內道場同義學沙門  
良賁等十六人叅譯仁王護國般若經并密嚴經先在  
多羅葉時並是偈頌今所譯者多作散文不空與錫等  
及翰林學士柳抗重更詳定錫充證義正員辭筆不愧  
斯職也

系曰錫外研儒墨其筆仍長時多請其論譔如忠國師

楚金等碑與晉陵德宣吳興晝公同獵廣原不知鹿死  
何人之手然宣錫二公亦有不羈之失緣飾過其實如  
晝公合建中之體儼事得其倫唯虛與實不可同日也

唐京師大安國寺子鄰傳

釋子鄰姓范氏兗州乾封大范村人也父峻朝不喜三  
寶或見桑門必加咄唾有問其故即欲毆焉隣生已數  
歲小字隣兒見著袈裟者則生慕羨之意開元初東都  
廣愛寺慶修律師遊于岱宗經范氏之舍隣一見之喜



貫顏色拜求出家問曰父母云何對曰不令堂親知知則遭筆撻矣師但先去某乃影隨律師行五里間隣已至矣及洛寺受教之易若甘之受和焉染削已或名志隣至十一年忽思二親辭歸寧覲其父喪明母終已三載矣因詣嶽廟求知母之幽趣即敷坐具誦法華經誓見天齊王為期其夜嶽神果召隣問何故懇苦如是隣曰母王氏亡來已經除服敢問大王母今何在王顧簿吏對曰王氏見繫獄受苦隣曰我母何罪王曰生和尚

時食雞卵又取白傅頭瘡坐是之故職汝之由隣悲號  
委頓求王請免曰繫縻有分放釋無門然則為法師計  
請往鄮山禮阿育王塔或可原也鄰詰朝遵途到句章  
山寺叩頭哀訴五輪著地禮畢投策至四萬數俄聞有  
呼鄰聲若蔡順之解望空見雲氣中母謝曰承汝之力  
得生忉利天矣故來報汝倏然不見鄰後求解經論至  
于闡輔間外學兼通美聲籍甚以名僧之選恒入肅宗  
內殿應奉高其舌端精於捷對御前口占叙述皇道時

輩靡及勅賜紫方袍充供奉僧代宗即位更崇釋氏永  
泰中不空重譯仁王護國密嚴等經鄰與千福寺法崇  
西明寺慧靜保壽寺圓寂分職證義並良賁潤文鄰莫  
測其終先所禮塔今鄆山育王寺後峯之翠微茅菴基  
及井存焉井實方池其水碧色綠苔泛泛然辭人遊者  
詩詠絕多矣

唐醴泉寺般若傳

釋般若蜀賓國人也貌質魁梧執戒嚴整在京師充義

學沙門憲宗敬崇佛門深思翻譯奈何有事于蜀部劉  
闢阻命王承宗未平朝庭多故至元和五年庚寅詔工  
部侍郎歸登孟簡劉伯芻蕭俛等就醴泉寺譯出經八  
卷號本生心地觀此之梵夾乃高宗朝師子國所進者  
寫畢進上帝覽有勅朕願為序尋頒下其文冠於經首  
三歲賜帛證義諸沙門錫賚有差先於貞元中譯華嚴  
經後分四十卷此蓋烏荼國王所進者于時而賜紫衣  
後大中中法寶大師玄暢奏請入藏焉

唐上都章敬寺悟空傳

釋悟空京兆雲陽人姓車氏後魏拓跋之遠裔也天假聰敏志尚典墳孝悌之聲藹于鄉里屬玄宗德被遐方蜀賓國願附大唐遣大首領薩婆達幹與三藏舍利越摩於天寶九載來朝闕庭請使巡按明年勅中使張韜光將國信行官兼吏四十餘人西邁時空未出俗名奉朝授左衛涇州四門府別將令隨使臣自安西路去至十二載至健陀羅國蜀賓東都城也其王禮接唐使使

迴空篤疾留健陀羅病中發願痊當出家遂投舍利越  
摩落髮號達摩馱都華言法界當肅宗至德二年也洎  
年二十九於迦濕彌羅國受具足戒文殊矢涅地為親  
教師鄔不羈提為羯磨阿遮利耶馱里巍地為教授於  
蒙鞞寺諷聲聞戒習根本律儀然北天竺國皆薩婆多  
學也後巡歷數年徧瞻八塔為憶君親因咨本師舍利  
越摩再三方允摩手授梵本十地迴向輪十力三經共  
一夾并佛牙舍利以贈別空行從北路至覩貨羅國五

十七蕃中有一城號骨咄國城東有小海空行次南岸  
地輒搖動雲陰雨暴霆擊電飛乃奔就一大樹間時有  
衆商咸投其下商主告衆曰誰齋佛舍利異物殊珍耶  
不爾龍神何斯忿怒有則投於海中無令衆人惶怖如  
藏匿者自貽咎空為利東夏之故潛乞龍神宥過自  
卯達申雨雹方霽迴及龜茲居蓮華寺遇三藏法師勿  
提提羴魚善於傳譯空因將十力經夾請翻之尋抵北  
庭大使復命空出梵夾于闐三藏戒法為譯主空證梵

文并度語翻成十地迴向輪經事訖隨中使段明秀以  
貞元五年己巳達京師勅於躍龍門使院安置進上佛  
牙舍利經本宣付左神策軍繕寫功德使竇文場寫畢  
進呈勅署空壯武將軍試太常卿乃歸章敬寺次返雲  
陽問二親墳樹已拱矣凡所往來經四十年于時已六  
十餘所翻經三本共十一卷翻經大德圓照續開元錄  
皆編入藏復記空之行狀焉

唐京師滿月傳

智慧輪



釋滿月者西域人也爰來震旦務在翻傳瑜伽法門一  
皆貫練既多神效衆所推欽開成中進梵夾遇偽甘露  
事去未旋踵朝廷無復紀綱不暇翻譯時悟達國師知  
一好學聲明禮月為師情相款密指教梵字并音字之  
緣界悉曇八轉深得幽趣玄曰昇哉吾體兩方之言願  
衆象胥之末可乎因請翻諸禁咒乃與菩提鱗目羅金  
剛悉地等重譯出陀羅尼集四卷又佛為毗戍陀天子  
說尊勝經一卷詳覈三復曲盡佛意此土先已有陀羅

尼集十二卷新翻四卷未聞入歲月等俱不測其終次  
有般若所迦三藏者華言智慧輪亦西域人大中中行  
大曼拏羅法已受灌頂為阿闍梨善達方言深通密語  
著佛法根本宗乎大毗盧遮那為諸佛所依法之根本  
者陀羅尼是也至於出生無邊法門學者修戒定慧以  
總持助成速疾之要無以超越又述示教指歸共一千  
餘言皆大教之鈐鍵也出弟子紹明咸通年中刻石記  
傳焉

論曰無漏海中震潮音而可怪總持言下書梵字而不  
常未聞者聞聞光音天之餘響未解者解解最上法之  
所詮聖賢飲之為醇醪凡劣啜之成糟粕若夫有緣則  
遇無道則違秦獄既械其利防此無緣也漢庭肇迎其  
白馬斯有感焉聽彼異呼覽其橫字情可求而呼相亂  
字雖殊而意且同是故周禮有象胥氏通六蠻語狄韞  
主七戎寄司九夷譯知八狄今四方之官唯譯官顯著  
者何也疑漢已來多事北方故譯名爛熟矣又如周秦

輶軒使者奏籍通別國方言令君王不出戶庭坐知絕  
遐異俗之語也若然者象胥知其遠也方言知其近也  
大約不過察異俗達遠情者矣懿乎東漢始譯四十二  
章經復加之為翻也翻也者如翻錦綺背面俱花但其  
花有左右不同耳由是翻譯二名行焉初則梵客華僧  
聽言揣意方圓共鑿金石難和婉配世間擺名三昧咫尺  
千里覲面難通次則彼曉漢談我知梵說十得八九  
時有差違至若怒目看世尊彼岸度無極矣後則猛顯

親往樊空兩通器請師子之膏鷲得水中之乳內豎對  
文王之問揚雄得絕代之文印印皆同聲聲不別斯謂  
之大備矣逖觀道安也論五失三不易彥琮也籍其八  
備明則也撰翻經儀式玄奘也立五種不翻此皆類左  
氏之諸凡同史家之變例今立新意成六例焉謂譯字  
譯音為一例胡語梵言為一例重譯直譯為一例麤言  
細語為一例華言雅俗為一例直語密語為一例也初  
則四句一譯字不譯音即陀羅尼是二譯音不譯字如

佛胸前卅字是三音字俱譯即諸經律中純華言是四  
音字俱不譯如經題上各有二字是第二胡語梵言者  
一在五天竺純梵語二雪山之北是胡山之南名婆羅  
門國與胡絕書語不同從羯霜那國字源本二十餘言  
轉而相生其流漫廣其書豎讀同震旦歟至吐貨羅言  
音漸異字本二十五言其書橫讀度葱嶺南迦畢試國  
言字同吐貨羅已上雜類為胡也若印度言字梵天所  
製本四十七言演而遂廣號青巖焉有十二章教授童

蒙大成五明論大抵與胡不同五印度境彌亘既遙安  
無少異乎又以此方始從東漢傳譯至于隋朝皆指西  
天以為胡國且失梵天之苗裔遂言胡地之經書彥琮  
法師獨明斯致唯徵造錄痛責彌天符佛地而合阿含  
得之在我用胡名而迷梵種失則誅誰唐有宣公亦同  
鼓唱自此若聞彈舌或覩黑容印定呼為梵僧雷同認  
為梵語琮師可謂忙於執斧捕前白露之蟬蛄在迴光  
照後黃衣之雀既云西土有梵有胡何不南北區分是

非料簡致有三失一改胡為梵不析胡開胡還成梵失也二不善胡梵二音致令胡得為梵失也三不知有重譯失也當初盡呼為胡亦猶隋朝已來總呼為梵所謂過猶不及也如據宗本而談以梵為主若從枝末而說稱胡可存何耶自五天至嶺北累累而譯也乃疑宗公留此以待今日亦不敢讓焉三亦胡亦梵如天竺經律傳到龜茲龜茲不解天竺語呼天竺為印特迦國者因而譯之若易解者猶存梵語如此胡梵俱有者是四二



非句純華言是也第三重譯直譯者一直譯如五印夾牒直來東夏譯者是二重譯如經傳嶺北樓蘭焉者不解天竺言且譯為胡語如梵云鄔波陀耶疎勒云鶻社于闐云和尚又天王梵云拘均羅胡云毗沙門是三亦直亦重如三藏直齋夾牒而來路由胡國或帶胡言如覺明口誦曇無德律中有和尚等字者是四二非句即齋經三藏雖兼胡語到此不翻譯者是第四麤言細語者聲明中一蕪漫多謂汎爾平語言辭也二彥底多謂

典正言辭也佛說法多依蘊漫多意住於義不依於文  
又被一切故若彥底多非諸類所能解故亦名全聲者  
則言音分明典正此細語也半聲者則言音不分明而  
訛僻此麤語也一是麤非細如五印度時俗之言是二  
唯細非麤如法護寶雲奘師義淨洞解聲明音律用中  
天細語典言而譯者是三亦麤亦細如梵本中語涉麤  
細者是或注云此音訛僻即麤言也四二非句闕第五  
華言雅俗者亦云音有楚夏同也且此方言語雅即經

籍之文俗乃街巷之說畧同西域細即典正麤即訛僻也一是雅非俗如經中用書籍言是二是俗非雅如經中乞頭博頰等語是三亦雅亦俗非學士潤文信僧執筆其間渾金璞玉交雜相投者是四二非句闕第六直語密語者二種作句涉俗為直涉真為密如婆留師是一是直非密謂婆留師翻為惡口住以惡口人人不親近故二是密非直婆留師翻為菩薩所知彼岸也既通達三無性理亦不為衆生所親近故三兩亦句即同善

惡真俗皆不可親近故四二非句謂除前相故又阿毗

持呵婁

目數數  
得定

鬱婆提

目生起拔  
根弃背

婆羅

目真實  
離散亂

此諸名在經

論中例顯直密語義也更有胡梵文字四句易解凡諸  
類例括彼經詮解者不見其全牛行人但隨其老馬矣  
或曰翻梵夾須用此方文籍者莫招濫涉儒雅之過乎  
通曰言不關典非子史之言用其翻對豈可以委巷之  
談而糅于中耶故道安云乃欲以千載上之微言傳所  
合百王下之末俗斯為不易矣或曰漢魏之際盛行斯

意致使陳壽國志述臨兒國云浮屠所載與中國老子經互相出入蓋老子西出關過西域之天竺教胡為浮屠此為見譯家用道德二篇中語便認云與老子經互相出入也設有華人能梵語與西僧言說兩相允會可便謂此人為天竺人耶蓋窮其始末乎是知若用外書須指此謗如童壽譯法華可謂折中有天然西域之語趣矣今觀房融潤文於楞嚴僧肇徵引而造論宜當此謂焉苟參鄙俚之辭曷異屠沽之譖然則揉書勿如無

書與其典也寧俗儻深溺俗厭過不輕折中適時自存  
法語斯謂得譯經之旨矣故佛說法多依蘇漫多也又  
傳譯之興奉行之意不明本起何示將來今究其宣揚  
畧陳梗概夫教者不倫有三疇類一顯教者諸乘經律  
論也不同瑜伽論中顯了二密教者瑜伽灌頂五部護  
摩三密曼拏羅法也瑜伽隱密教是多分聲聞藏教三心教者直指人  
心見性成佛禪法也次一法輪者即顯教也以摩騰為  
始祖焉次二教令輪者即密教也以金剛智為始祖焉

次三心輪者

義加此輪

即禪法也以菩提達磨為始祖焉是

故傳法輪者以法音傳法音傳教令輪者以祕密傳祕

密傳心輪者以心傳心此之三教三輪三祖自西而東

化凡而聖流十五代

漢魏晉宋齊梁陳隋唐朱梁後唐石晉劉漢郭周今大宋

法門

之胎厥孫謀萬二千年真教之克昌厥後或曰譯場經

館設官分職不得聞乎曰此務所司先宗譯主即齋葉

書之三歲明練顯密二教者充之次則筆受者必言通

華梵學綜有空相問委知然後下筆西晉偽秦已來立

此員者即沙門道含玄贍姚嵩聶承遠父子至於帝王  
即姚興梁武天后中宗或躬執翰又謂為綴文也次則  
度語者正云譯語也傳度轉令生解亦名傳語如翻顯  
識論沙門戰陀譯語是也次則證梵本者求其量果密  
能證知能詮不差所顯無謬矣如居士伊舍羅證譯毗  
柰耶梵本是也至有立證梵義一員乃明西義得失貴  
令華語下不失梵義也復立證禪義一員沙門大通充  
之次則潤文一位員數不恒令通內外學者充之良以



筆受在其油素文言豈無俚俗儻不失於佛意何妨刊而正之故義淨譯場則李嶠韋嗣立盧藏用等二十餘人次文潤色也次則證義蓋證已譯之文所詮之義也如譯婆沙論慧嵩道朗等三百人考正文義唐復禮累場充任焉次則梵唄法筵肇啟梵唄前興用作先容令生物善唐永泰中方聞此位也次則校勘讐對已譯之文隋則彥琮覆疏文義蓋重慎之至也次則監護大使後周平高公侯壽為總監檢校唐則房梁公為樊師監

護相次許觀楊慎交杜行顗等充之或用僧員則隋以  
明穆曇遷等十人監掌翻譯事詮定宗旨其處則秦逍  
遙園梁壽光殿瞻雲館魏汝南王宅又隋煬帝置翻經  
館其中僧有學士之名唐於廣福等寺或宮園不定又  
置正字字學玄應曾當是職後或置或否朝廷罷譯事  
自唐憲宗元和五年至於周朝相望可一百五十許歲  
此道寂然迨我皇帝臨大寶之五載有河中府傳顯密  
教沙門法進請西域三藏法天譯經于蒲津州府官表

進上覽大悅各賜紫衣因勅造譯經院於太平興國寺  
之西偏續勅搜購天下梵夾有梵僧法護施護同叅其  
務左街僧錄智照大師慧溫證義又詔滄州三藏道圓  
證梵字慎選兩街義解沙門志顯綴文令遵法定清沼  
筆受守巒道真知遜法雲慧超慧達可瓌善祐可支證  
義倫次綴文使臣劉素高品王文壽監護禮部郎中張  
洎光祿卿湯悅次文潤色進校量壽命經善惡報應經  
善見變化金曜童子甘露鼓箏經有命授三藏天息災

法天施護師號外試鴻臚少卿賜廐馬等筆受證義諸  
沙門各賜紫衣并帛有差御製新譯經序冠於經首觀  
其佛日重光法輪發軔赤玉箱而啟祕青蓮朶以開芳  
聖感如然前代孰堪比也又以宣譯之者樂畧樂繁隋  
之已前經題簡少義淨已降經目偏長古則隨取強名  
後則繁盡我意又舊翻祕咒少注合呼唐譯明言多詳  
音反受持有驗斯勝古蹤淨師大譯諸經偏精律部自  
高文彩最有可觀金剛智也祕藏祖師阿目佉也多經

譯匠師資相接感應互彰無畏言辭且多朴實覺救加  
佛頂之句人無間然日照出顯識之文又有餘地思惟  
冒索學喜華嚴密語斷章大人境界流志寶積菩提曼  
荼華胥之理致融明灌頂之風標祕邃迪公勤其筆受  
般若終乎譯場其餘諸公皆翻夾牒欲知狀貌聊舉喻  
言其猶人也人皆人也奈何姿制形儀各從所肖肖其  
父焉若如此大則同而小有異耳良由譯經是佛法之  
本本立則道生其道所生唯生釋子是以此篇冠首故

曰先王將滎海必先有事於河者示不忘本也

宋高僧傳卷三

欽定四庫全書

宋高僧傳卷四

宋 釋贊寧 撰

義解篇第二之一

正傳二十一人附見七人

唐京兆大慈恩寺窺基傳

釋窺基字洪道姓尉遲氏京兆長安人也尉遲之先與後魏同起號尉遲部如中華之諸侯國入華則以部為姓也魏平東將軍說六代孫孟都生羅迦為隋代州西



鎮將乃基祖焉考諱宗唐左金吾將軍松州都督江由  
縣開國公其鄂國公德則諸父也唐書有傳基母裴氏  
夢掌月輪吞之寤而有孕及乎盈月誕彌與羣兒弗類  
數方誦習神悟精爽獎師始因陌上見及眉秀目朗舉  
措疎畧曰將家之種不謬也哉脫或因緣相扣度為弟  
子則吾法有寄矣復念在印度時計迴程次就尼捷子  
邊占得卦甚吉師但東歸哲資生矣遂造北門將軍微  
諷之出家父曰伊類麤悍那勝教詔獎曰此之器度非

將軍不生非某不識父雖然諾基亦強拒激勉再三拜  
以從命奮然抗聲曰聽我三事方誓出家不斷情欲葷  
血過中食也樊先以欲勾牽後令入佛智佯而肯焉行  
駕累載前之所欲故關輔語曰三車和尚即貞觀二十  
二年也一基自序云九歲丁艱漸疎浮俗若然者三車  
之說乃厚誣也至年十七遂預緇林及乎入法奉勅為  
樊師弟子始住廣福寺尋奉別勅選聰慧穎脫者入大  
慈恩寺躬事樊師學五竺一語解紛開結統綜條然聞見

者無不歎伏凡百捷度跋渠一覽無差寧勞再憶年二十五應詔譯經講通大小乘教三十餘本創意留心勤勤著述蓋切問而近思其則不遠矣造疏計可百本樊所譯唯識論初與昉尚光四人同受潤色執筆檢文纂義數朝之後基求退焉樊問之對曰夕夢金容晨趨白馬雖得法門之糟粕然失玄源之醇粹某不願立功於叅糴若意成一本受責則有所歸樊遂許之以理遣三賢獨委於基此乃量材授任也時隨受撰錄所聞講周

疏畢無何西明寺測法師亦俊朗之器於唯識論講場  
得計於闇者賂之以金潛隱厥形聽尋聯綴亦疏通論  
旨猶數座方畢測於西明寺鳴椎集僧稱講此論基聞  
之慙居其後不勝悵快獎勉之曰測公雖造疏未達因  
明遂為講陳那之論基大善三支縱橫立破迷義命章  
前無與比又云請獎師唯為已講瑜伽論還被測公同  
前盜聽先講獎曰五性宗法惟汝流通他人則否後躬  
遊五臺山登太行至西河古佛宇中宿夢身在半山巖

下有無量人唱苦聲冥昧之間初不忍聞徒步陟彼層  
峯皆瑠璃色盡見諸國土仰望一城城中有聲曰住住  
咄基公未合到此斯須二天童自城出問曰汝見山下  
罪苦衆生否答曰我聞聲而不見形童子遂投與劍一  
鐔曰剖腹當見矣基自剖之腹開有光兩道輝映山下  
見無數人受其極苦時童子入城持紙二軸及筆投之  
捧得而去及旦驚異未已過信夜寺中有光久而不滅  
尋視之數軸發光者探之得彌勒上生經乃憶前夢必

慈氏令我造疏通暢厥理耳遂援毫次筆鋒有舍利二  
七粒而隕如吳含桃許大紅色可愛次零然而下者狀  
如黃梁粟粒一云行至太原傳法三車自隨前乘經論  
箱囊中乘自御後乘家妓女僕食饌於路間遇一老父  
問乘何人對曰家屬父曰知法甚精攜家屬偕恐不稱  
教基聞之頓悔前非脩然獨往老父則文殊菩薩也此  
亦卮語矣隨奘在玉華宮叅譯之際三車何處安置乎  
基隨處化徒獲益者衆車行博陵有請講法華經遂造

大疏焉及歸本寺恒與翻譯舊人往還屢謁宣律師宣  
每有諸天王使者執事或冥告雜務爾日基去方來宣  
怪其遲暮對曰適者大乘菩薩在此善神翼從者多我  
曹神通為他所制故爾以永淳元年壬午示疾至十一  
月十三日長往於慈恩寺翻經院春秋五十一法臘無  
間葬於樊村北渠柩三歲樊師瑩隴焉弟子哀慟餘外  
執紼曾葬黑白之衆盈於山谷基生常勇進造彌勒像  
對其像日誦菩薩戒一遍願生兜率求其志也乃發通

身光瑞爛然可觀復於五臺造玉石文殊菩薩像寫金字般若經畢亦發神光焉弟子相繼取基為折中視之如契在焉太和四年庚戌七月癸酉遷塔於平原大安國寺沙門金儉檢校塔亭徙棺見基齒有四十根不斷玉如衆彈指言是佛之一相焉凡今天下佛寺圖形號曰百本疏主真高宗大帝製譜一云玄宗然基魁梧堂堂有桓赴之氣而慈濟之心誨人不倦自天然也其符彩則項負玉枕面部宏偉交手十指若印契焉名諱上



字多出沒不同者為以慈恩傳中云樊師龍朔三年於玉華宮譯大般若經終筆其年十一月二十二日令大乘基奉表奏聞請御製序至十二月七日通事舍人馮義宣由此云靈基開元錄為窺基或言乘基非也彼曰大乘基蓋慧立彥悰不全斥故云大乘基如言不聽泰耳猶謹遣大乘光奉表同也今海內呼慈恩法師焉

系曰性相義門至唐方見大備也樊師為瑜伽唯識開創之祖基乃守文述作之宗唯祖與宗百世不除之祀

也蓋功德被物廣矣大矣矣苟無基則何祖張其學乎  
開天下人眼目乎二師立功與言俱不朽也然則基也  
鄂公猶子樊師門生所謂將家來為法將千載一人而  
已故書有之厥父齒厥子乃弗肯播矧肯獲其百本疏  
主之謂歟

唐京師西明寺道世傳

釋道世字玄暉姓韓氏厥先伊闕人也祖代因官為京  
兆人馬生且渥潤漸而聰敏俄厭衆沙思叅救蟻二親

鍾愛過絕其請久而遂心時年十二於青龍寺出家從  
執德瓶止臨欣鑑律宗研覈書籍錯尋特慕上乘融明  
實性於時籍甚三輔欽歸顯慶年中大帝以玄奘師所  
翻經論未幾詔入內及慈恩寺大德更代行道不替於  
時世亦預其選及為皇太子造西明寺爰以英博名入  
斯寺時道宣律師當塗行律世且旁敷同驅五部之車  
共導三乘之軌人莫我及道望芬然復因講貫之餘仍  
覽甚深之藏以為古今綿代製作多人雖雅趣佳辭無

足於傳記由是塞文囿之菁華嗅大義之瞻荀以類編  
錄號法苑珠林總一百篇勒成十表始從劫量終乎雜  
記部類之前各序別論令學覽之人就門隨部揜括所  
知如提綱焉如舉領焉世之用心周乎十稔至總章元  
年畢軸蘭臺郎李儼為之都序此文行於天下又著善  
惡業報及信福論共二十三卷大小乘禪門觀及大乘  
觀共十一卷受戒儀式禮佛儀式共六卷四分律討要  
五卷四分律尼鈔五卷金剛經集注三卷十部都一百

金史卷之八十三  
五十三卷世頗多著述未測其終名避太宗廟諱多行  
字耳故時稱玄憚焉

唐京兆大慈恩寺普光傳

釋普光未知何許人也明敏為性爰擇其本請事三藏  
獎師勤恪之心同列靡及至於智解可譬循環間少證  
多獎師默許未叅傳譯頭角特高左右三藏之美光有  
功焉初獎嫌古翻俱含義多缺然躬得梵本再譯真文  
乃密授光多是記憶西印薩婆多師口義光因著疏解

判一云其疏至圓暉畧之為十卷如漢之有淹歟又嘗  
隨奘往玉華宮譯大般若經厥功出乎裨贊也時號大  
乘光觀夫奘自貞觀十九年創譯記麟德元年終於玉  
華宮凡二十載總出大小乘經律論七十五部一千三  
百三十五卷十分七八是光筆受或謂嘉光普光也若  
驗從辯機同叅譯務即普光是也

唐京兆大慈恩寺法寶傳

勝莊

釋法寶亦三藏奘師學法之神足也性靈敏利最所先

焉。奘初譯婆沙論畢，寶有疑情，以非想見惑，請益之。奘別以十六字入乎論中，以遮難辭。寶曰：「奘曰：此二句四句為梵本，有無。奘曰：吾以義意酌情作耳。」寶曰：「師豈宜以凡語增加聖言量乎？」奘曰：「斯言不行，我知之矣。」自此魚焦頡頑於奘之門。至乎六離合釋，義俱舍宗，以寶為定量矣。光師往往同迦濕彌羅餘師禮記衍字也。時光寶二法師若什門之融叡焉。後越精義學，令問孔膠。長安三年，於福先寺、京西明寺預義淨譯場，寶與法藏勝。

莊等證義於時頗露頭角莫之與京歟

唐京師西明寺圓測傳

薄塵  
靈解

釋圓測者未詳氏族也自幼明敏慧解縱橫三藏獎師  
為慈恩基師講新翻唯識論測賂守門者隱聽歸則緝  
綴義章將欲罷講測於西明寺鳴鐘召衆稱講唯識基  
嫌其有奪人之心遂讓測講訓獎講瑜伽還同前盜聽  
受之而亦不後基也迨高宗之末天后之初應義解之  
選入譯經館衆皆推挹及翻大乘顯識等經測充證義



與薄塵靈辯嘉尚攸方其駕所著唯識疏鈔詳解經論  
天下分行焉

唐京師安國寺元康傳

釋元康不詳姓氏貞觀中遊學京邑有彭亨之譽形擁  
腫而短然其性情酋勇聞少解多羣輩推許先居山野  
恒務持誦觀音求加慧解遂感鹿一首角分八岐厥形  
絕異康見之撫而馴伏遂拳養之乘而致遠曾無倦色  
以三論之文荷之於背又以小軸繫之於尾曳入上都

意為戲弄說有之徒不達空性我與輕軸碾之令悟真理又衣大布曳納播戴竹笠笠寬丈有二尺裝飾詭異人皆駭觀既入京城見一法師盛集講經化導康造其筵近其座便就所講義申問往返數百言人咸驚康之辯給如此復戲法師曰甘桃不結實苦李壓低枝講者曰輪王千箇子卷伯勿孫兒蓋譏康之無生徒也康曰丹之藏者赤漆之藏者黑隨汝之赤者非纏絳焉入汝之黑者非鉛墨焉舉衆皆云辭理渙然可非垂跡之大

士也帝聞之喜曰何代無其人詔入安國寺講此三論  
遂造疏解中觀之理別撰玄樞兩卷總明中百門之宗  
旨焉後不測其終

系曰康師曳納播者何通曰梵言立播華言裹腹衣亦  
云抱腹形制如偏袒一幅纔穿得手肩袖不寬著在左  
邊右邊施帶多貯綿絮然是禦寒之服熱國則否用此  
亦聖開流於東土則變成色帛而削幅綴於左右袖上  
垂之製曳然旌表我通瞻經論一本則曳一支多則多

曳未知稽古自何人始乎今單言播畧立字耳全非禦  
寒之意翻為我慢之衣既失元端而多濫作別形聖教  
以俟後賢此外無施異制以亂大倫詩曰服之不稱身  
之灾也吁

唐簡州福聚寺靖邁傳

釋靖邁梓潼人也少孺矜持長高志操特於經論研覈  
造微氣性沉厚不妄交結遊必擇方抵於京輔貞觀中  
屬玄奘西迴勅奉為太穆太后於京造廣福寺就彼翻

譯所須吏力悉與玄齡商量務令優給遂召證義大德  
諳練大小乘經論為時所尊尚者得一十一人邁預其  
精選即居慈恩寺也同普光寺棲玄廣福寺明濬會昌  
寺辯機終南山豐德寺道宣同執筆綴文翻譯本事經  
七卷邁後與神昉筆受於玉華宮及慈恩寺翻經院皆  
推邁變故得經心矣後著譯經圖紀四卷銓序古今經  
目譯人名位單譯重翻疑偽等科一皆條理見編於藏  
開元中智昇又續其題目焉

唐新羅國順璟傳

釋順璟者浪郡人也本土之氏族東夷之家系故難詳  
練其重譯學聲教蓋出天然況乎因明之學奘師精研  
付受華僧尚未多達璟之克適非其宿殖之力自何而  
至於是歟傳得奘師真唯識量乃立決定相違不定量  
於乾封年中因使臣入貢附至於時奘師長往向及二  
年其量云真故極成色定離眼識自許初三攝眼所不  
攝故猶如眼根良以三藏隱密周防非大智不明璟為

宗云不離於眼識自許初三攝眼所不攝故猶如眼識也如此善成他義時大乘基覽此作便見璟所不知雖然終仰邊僧識見如此故歎之曰新羅順璟法師者聲振唐蕃學包大小業崇迦葉唯執行於杜多心務薄拘恒馳聲於少欲既而蘊藝西夏傳照東夷名道日新緇素欽揖雖彼龍象不少海外時稱獨步於此量作決定相違基師念遠國之人有茲利慧捨突契師暗中機發善成三藏之義惜哉璟在本國稍多著述亦有傳來中

原者其所宗法相大乘了義教也見華嚴經中始從發心便成佛已乃生謗毀不信或云當啟手足命弟子輩扶掖下地地則徐裂璟身俄墜時言生身陷地獄焉於今有坑廣袤丈餘甃坎窅然號順璟捺落迦也

系曰曲士不可以語道者東其教也是故好白者以黑為污好黑者以白為污焉璟怒心尤重猛利業增如射箭頃墮在地獄列高僧品次起穢以自臭耶通曰難信之法易速謗誚謗誚豈唯一人乎俾令衆所知識者直



陷三塗乃知順璟真顯教菩薩也況乎趙盾為法受惡  
菩薩乃為法亡身斯何足怪君不見尼犍外道一一謗  
佛而獨使提婆生陷後於法華會上受記作佛靜言思  
之

唐京兆大慈恩寺嘉尚傳

釋嘉尚未知何許人也慧性天資瓌奇氣質篇聚堅守  
性相克攻勤在進修務於翻譯達棲心於契三藏門見  
宗廟之富窺室家之好久稽考瑜伽師地佛地論旨成

唯識論深得義趣隨奘於玉華宮譯大般若經充證義  
綴文多能傑出及三歲有疾命尚具錄所翻經論合七  
十五部總一千三百三十五卷又錄俱胝畫像一千幀  
造十俱胝像寫經放生然燈令尚宣讀奘合掌歡喜曰  
吾心中願也汝代導之得沒而無悔焉奘卒著述疏鈔  
出雜集義門夥多天后朝同薄塵靈辯等預譯場證義  
功績愈繁尚初侍奘師在玉華宮翻經至初會嚴淨佛  
土品說諸佛菩薩以神通願力盛大千界上妙珍寶諸

妙香花及意樂所生五塵妙境供養莊嚴說法處與寺  
主慧德夜觀玉華寺內廣博嚴淨伎樂盈滿又聞三堂  
講法明日白契歡喜符合尚不知所終

唐淄州慧沼傳

大願  
塵外

釋慧沼不知何許人也少而警慧始預青衿依於庠序  
誦習該通入法修身不違戒範乃被時諺沼闇黎焉次  
攻堅於經論善達翻傳自契三藏到京恒窺壺奧後親  
大乘基師更加精博及菩提流志於崇福寺譯大寶積

經治預其選充證義新羅勝莊法師執筆沙門大願塵  
外皆一時英秀當代象龍於時武平一充使盧藏用陸  
景初總預斯場中書侍郎崔湜因行香至翻經院歎曰  
清流盡在此矣豈應見隔因奏請乞同潤色新經初治  
證義於義淨譯場多所刊正訛言舛義悉從指定無敢  
踰制後著諸疏義號淄州治也

唐京兆大慈恩寺彥悰傳

釋彥悰未知何許人也貞觀之末觀光上京求法於三

藏法師之門然其才不迨光實偏長綴習學耳於玄儒之業頗見精微辭筆之能殊超流輩有魏國西寺沙門慧立性氣怱怱以護法為己任著傳五卷專記三藏自貞觀中一行盛化及西域所歷夷險等號慈恩傳蓋取寺題也及削藁云畢慮遺諸美遂藏於地穴至疾亟命門徒堀土出之而卒其本數年流散他所搜購乃獲弟子等命悰排次之序引之或文未允或事稍虧重更申明曰箋述是也乃象鄭司農箋毛之詁訓也或有調之

曰子與隋彥琮相去幾何對曰賜也何敢望回雖長卿  
慕蘭心宗慕於玉宗故有以也詩曰言念君子溫其如  
玉自許亦顏之士也或人許焉琮不知終所

唐新羅國義湘傳

釋義湘俗姓朴雞林府人也生且英奇長而出離逍遙  
入道性分天然年臨弱冠聞唐土教宗鼎盛與元曉法  
師同志西遊行至本國海門唐州界計求巨艦將越滄  
波倏於中途遭其苦雨遂依道旁土龕間隱身所以避

飄濕焉迨乎明旦相視乃古墳骸骨旁也天猶霰霖地  
且泥塗尺寸難前逗留不進又寄挺覽之中夜之未央  
俄有鬼物為怪曉公嘆曰前之寓宿謂土龕而且安此  
夜留宵託鬼鄉而多崇則知心生故種種法生心滅故  
龕墳不二又三界唯心萬法唯識心外無法胡用別求  
我不入唐却攜囊返國湘乃隻影孤征誓死無退以總  
章二年附商船達登州岸分衛到一信士家見湘容色  
挺拔留連門下既久有少女麗服靚粧名曰善妙巧媚

誨之湘之心石不可轉也女調不見答頓發道心於前  
矢大願言生生世世歸命和尚習學大乘成就大事弟  
子必為檀越供給資緣湘乃徑趨長安終南山智儼三  
藏所綜習華嚴經時康藏國師為同學也所謂知微知  
章有倫有要德瓶云滿藏海嬉遊乃議迴程傳法開誘  
復至文登舊檀越家謝其數稔供施便募商船遂巡解  
纜其女善妙預為湘辦集法服并諸什器可盈篋笥運  
臨海岸湘船已遠其女咒之曰我本實心供養法師願



是衣篋跳入前船言訖投篋於駭浪有頃疾風吹之若鴻毛耳遙望徑跳入船矣其女復誓之我願是身化為大龍扶翼舳艫到國傳法於是攘袂投身於海將知願力難屈至誠感神果然伸形夭矯或躍蜿蜒其舟底寧達於彼岸湘入國之後徧歷山川於駒麗百濟風馬牛不相及地曰此中地靈山秀真轉法輪之所無何權宗異部聚徒可半千衆矣湘默作是念大華嚴教非福善之地不可興焉時善妙龍恒隨作護潛知此念乃現大

神變於虛空中化成巨石縱廣一里蓋於伽藍之頂作  
將墮不墮之狀羣僧驚駭罔知攸趣四面奔散湘遂入  
寺中敷闡斯經冬陽夏陰不召自至者多矣國王欽重  
以田莊奴僕施之湘言於王曰我法平等高下共均貴  
賤同揆涅槃經八不淨財何莊田之有何奴僕之為貧  
道以法界為家以孟耕待稔法身慧命藉此而生矣湘  
講樹開花談叢結果登堂覩奧者則智通表訓梵體道  
身等數人皆啄巨鰕飛出迦留羅鳥焉湘貴如說行講

宣之外精勤修練莊嚴剎海靡憚暄涼又常行義淨洗  
擻法不用巾帨立期乾燥而止持三法衣瓶鉢之餘曾  
無他物凡弟子請益不敢造次伺其怡寂而後啟發相  
乃隨疑解滯必無滓核自是已來雲遊不定稱可我心  
卓錫而居學侶蜂屯或執筆書紳懷鉛札葉抄如結集  
錄似載言如是義門隨弟子為目如云道身章是也或  
以處為名如云錐穴問答等數章疏皆明華嚴性海毗  
盧遮那無邊契經義例也湘終於本國塔亦存焉號海

東華嚴初祖也

唐京兆大慈恩寺義忠傳

釋義忠姓尹氏潞府襄垣人也年始九歲宿殖之性志願出家得淄州洺閣黎為師若鳳巢中之生鷄雛也少秉竒操慧解不倫洺授與大涅槃經時十三歲矣相次誦徹四十卷衆皆驚駭號空門竒童也二十登戒學四分律義理淹通旁習十二門論二本即當講演洺師知是千里之駿學恐失時間長安基師新造疏章門生填

委聲振天下乃師資相將同就基之講肆未極五年又  
通二經五論則法華無垢稱及百法因明俱舍成唯識  
唯識道等也由茲開獎弟子繁多講樹別茂於枝條義  
門旁開於闢竅乃著成唯識論纂要成唯識論鈔三十  
卷法華經鈔二十卷無垢稱經鈔二十卷百法論疏最  
為要當移解二無我歸後是以掩慈恩之繁於今盛行  
勿過忠本所謂列羣玉貫衆花玉裝瓊樹之林花綴蜀  
機之錦輩流首伏聲彩悠颺況基師正照於太陽忠也

旁銜於龍燭四方美譽千里歸心者不可勝筭矣傳持  
靡怠僅五十餘年計講諸教七十許徧至年七十二忽  
起懷土之心歸於昭義示同初夏誦戒行道每一坐時  
面向西北仰視兜率天宮冥心內院願捨壽時得見天  
主永離凡濁終得轉依一日晨興漂洗訖整肅容儀望  
空禮拜如有哀告之狀少頃結加趺坐囑付流通教法  
之意畢忽異香滿室彩雲垂空忠合掌仰視曰穢弱比  
丘何煩大聖躬來引接言盡而化鄉人道教建塔供養

全身不壞至今河東鄉里高岡存焉

唐新羅國黃龍寺元曉傳

大安

釋元曉姓薛氏東海湘州人也卅髫之年惠然入法隨師稟業遊處無恒勇擊義園雄橫文陣伉伉然桓桓然進無前却蓋三學之淹通彼土謂為萬人之敵精義入神為若此也嘗與湘法師入唐慕奘三藏慈恩之門厥緣既差息心遊徃無何發言狂悖示跡乖疎同居士入酒肆倡家若誌公持金刀鐵錫或製疏以講雜華或撫

琴以樂祠宇或閭閻寓宿或山水坐禪任意隨機都無  
定檢時國王置百座仁王經大會徧搜碩德本州以名  
望舉進之諸德惡其為人譖王不納居無何王之夫人  
腦嬰癰腫醫工絕驗王及王子臣屬禱請山川靈祠無  
所不至有巫覡言曰苟遣人往他國求藥是疾方瘳王  
乃發使泛海入唐募其醫術溟漲之中忽見一翁由波  
濤躍出登舟邀使人入海觀宮殿嚴麗見龍王王名鈴  
海謂使者曰汝國夫人是青帝第三女也我宮中先有



金剛三昧經乃二覺圓通示菩薩行也今託仗夫人之  
病為增上緣欲附此經出彼國流布耳於是將三十來  
紙重沓散經付授使人復曰此經渡海中恐懼魔事王  
令持刀裂使人膈腸而內於中用蠟紙纏滕以藥傅之  
其膈如故龍王言可令大安聖者銓次綴縫請元曉法  
師造疏講釋之夫人疾愈無疑假使雪山阿伽陀藥力  
亦不過是龍王送出海面遂登舟歸國時王聞而歡喜  
乃先召大安聖者黏次焉大安者不測之人也形服特

異恒在市鄺擊銅鉢唱言大安大安之聲故號之也王  
命安安云但將經來不願入王宮闕安得經排來成八  
品皆合佛意安曰速將付元曉講餘人則否曉受斯經  
正在本生湘州也謂使人曰此經以本始二覺為宗為  
我備角乘將案几在兩角之間置其筆硯始終於牛車  
造疏成五卷王請剋日於黃龍寺敷演時有薄徒竊盜  
新疏以事白王延干三日重錄成三卷號為畧疏洎乎  
王臣道俗雲擁法堂曉乃宣吐有儀解紛可則稱揚彈

指聲沸於空曉復昌言曰昔日採百樣時雖不預會今朝橫一棟處唯我獨能時諸名德俯顏慙色伏膺懺悔焉初曉示跡無恒化人不定或擲盤而救衆或噴水而撲焚或數處現形或六方告滅亦盃渡誌公之倫歟其於解性覽無不明矣疏有廣畧二本俱行本土畧本流入中華後有翻經三藏改之為論焉

系曰海龍之宮自何而有經本耶通曰經云龍王宮殿中有七寶塔諸佛所說諸深義別有七寶篋滿中盛之

謂十二因緣總持三昧等良以此經合行世間復顯大安曉公神異乃使夫人之疾為起教之大端者也

周京兆崇福寺神楷傳

明

釋神楷姓郭氏太原人也即漢末林宗之後世襲冠裳後隨父宦於秦為京兆人也昆弟六人楷居其季幼而聰敏立志弗羣不樂浮榮誓求翦落禮明恂法師為弟子即大乘恂也洎乎年滿受具於經論義理大小該通耳聞口誦譬鮮艷之易染遂講攝大乘俱舍等論穎悟

輩流罕有齊駕後因講淨名經見古師判處喟然歎曰  
美則美矣未盡善也乃於安陸白趙山撰疏一云在越  
州剡石城寺述作素有巧性於剡溪南巖之下映水塑  
貌今有池已涸矣巖下石隙縫間幽暗然中有木棺者  
云是楷殯於此遊人下窺歷歷皆覩又言楷因慈恩西  
明等寺度公者出家及翻經論勅諸道高行才學僧並  
赴京師遂應詔而入配居崇業寺至天后朝方行其疏  
後卒於此寺弟子遷塔於南道遙園焉實大乘基之法

門猶子也

系曰楷師遺跡何京兆剡溪二處孰是令人疑惑若兩家之俱見薊訓焉此乃古人名顯於四方因子孫南北遷徙追念先宗遂有僞置焉如晉氏渡江衣冠之家多立祖先之遺跡同也若然者剡則是楷曾遊歷之地也

周京兆廣福寺會隱傳

釋會隱不詳何許人也精明之氣綽有盈餘處於等夷若雞羣之見鶴也天皇帝朝慎選高學名德隱膺斯選麟

德二年勅北門西龍門修書所同與西明寺玄則等一  
十人於一切經中畧出精義玄文三十卷號禪林要鈔  
書成奏呈勅藏祕閣隱亦嘗預翻譯玄則頗聞著述高  
宗朝斯為龍象之最焉

周虎丘山寺僧瑗傳

釋僧瑗字辯空姓郁氏高平昌邑人也姬水疏源狼亭  
襲慶魯相繼昌侯之業歷載彌光少傳纂尚書之風清  
塵不昧瑗宿殖奇穎早擅嘉祥母趙氏娠孕之日側侍

聖賢浮空遊樂及年六歲隨母入舍利塔見聖僧像欣然跳躍狀若舊交因啟母出家母以其尚幼抑而未許至年十三方遂其志依虎丘寺慧嚴法師為弟子謙揖之操出自生知辯慧之能業稱上首以龍朔二年奉勅剃翦冥符所應還隸此山暨嚴公長往乃依慧詡禪師受具足戒聰常樂寺聰法師三論甚深無相疑滯豁除方便解脫怡然獨悟因智從心證遂詣江寧融禪師求學心法攝念坐禪衆魔斯伏勤行精進猛獸恒馴是以



名稱普聞聲光八絕旗亭趨利削跡無踐冬夏不易常  
披一衲或滴水以充於夕渴或數粒將濟於朝飢或風  
雪凜凜禮誦無替於六時或炎暑熾熾經行不虧於少  
選稱揚歡羨容色湛如毀辱訶罵歡喜而受每蔭以長  
松屬思鴻遠清泉獨坐映定水以彫文虛室高栖藹禪  
枝而蕩慮撰武丘名僧苑一卷注郁子兩卷文集三卷  
蓋道俗之儀表人物之師範焉永昌元年十二月十二  
日見身有疾謂弟子曰吾聞屍所到處便為穢惡出就

別方乃稱離罪爾門弟子等迎止於通波亭北靜志莊  
忽聞異香從空而下爰遺訓勤切正觀叮嚀滅後可依  
外國法言訖合掌而終春秋五十有一緇素奔慟咸悲  
眼滅弟子僧義玄及雒山縣尉檀信等同遵師旨如法  
闍維收其舍利於寺建塔勒銘於所

唐會稽山妙喜寺印宗傳

釋印宗姓印氏吳郡人也母劉氏始娠鄰家咸見一沙  
門端雅徐步入印舍白劉曰願為子焉母夢同此再三

陳讓不克父夢有饋梅檀香木童子跪授付劉劉頓厭  
葷羶俗門食味隔在脣吻之外及生而長從師誦通經  
典末最精講者涅槃經咸亨元年在京都盛揚道化上  
元中勅入大愛敬寺居辭不赴請於蘄春東山忍大師  
諮受禪法復於番禺遇慧能禪師問答之間深詣玄理  
還鄉地刺史王冑禮重殊倫請置戒壇命宗度人可數  
千百續勅召入內乃造慈氏大像所著心要集起梁至  
唐天下諸達者語言總錄焉又奉勅江東諸寺院天柱

報恩各置戒壇度人又纂百家諸儒士三教文意表明  
佛法者重結集之手筆逾高著述流布至先天二年二  
月二十一日示終囑循輪王法葬之年八十七會稽王  
師乾立塔銘焉

唐太原府崇福寺宗哲傳

釋宗哲西河平遙人也推歲而有奇相聰穎天資既尋  
師範砥節飾躬屬玄奘三藏新翻諸經論哲就其門請  
益無替凡幾周星備窮諸典若指於掌於奘門下號為

得意哲猶隋慧布之題目焉後因講唱厥義日新時謂之為法江哲曰為吾謝此品藻焉殊不知法海在乎太原矣所指者蓋浮丘為滄溟也哲憫學者不達其意而師詩哉乃著義例寰海之內莫不企羨其如說佛位三事喻中治法師言三點三目強分上下勝劣配屬太成巧誣哲云三事俱得然無名師品量退而省之哲其得矣號之得意豈虛也乎治師所以成餘師之說也

唐洛京佛授記寺德感傳

釋德感姓侯氏太原人也儀容瓌麗學業精贍衆典服  
勤於瑜伽論特振聲彩天皇帝徵為翻經大德又與  
勝莊大儀等同叅義淨譯場對啟受賜言謝劉亮帝悅  
尋授封昌平縣開國公累升田至三千戶帝為讚曰河  
汾之寶山嶽之英早祛俗累夙解塵纓緇門仰德紺宇  
馳聲式亞龍樹爰齊馬鳴為時君之所貴為若此也御  
製風行緇伍榮之後充河南佛授記寺都維那晚升寺  
任中外肅然終年六十餘著義門行於世如其七方便

人迴心漸頓悟義與湛法師為勅敵耳故交綏而退焉

唐太原崇福寺浮丘傳

釋浮丘姓張氏太原人也挺然奇表慧悟絕倫於瑜伽論差成精博旁綜羣書言分雅俗四方學者爭造其門然訥於宣剖敏於通解深藏若虛庸庸品類多所不知於時哲公露其頭角博聞強識之者懼其觝觸豈況諸餘乎哲惟神伏丘之義學故謂為法海焉享年七十餘終於所居然未聞其有所著述矣





宋高僧傳卷四